



FONDACIJA
HASTOR

Godišnji izvještaj

2021
2022

Sadržaj

1. UVODNA RIJEČ DIREKTORA
2. O NAMA
3. PROCES ODABIRA STIPENDISTA
4. 16 GODINA KONTINUIRANOG POSTOJANJA I DJELOVANJA FONDACIJE HASTOR
5. REZULTATI, USPJESI 2021/2022
6. NAJZNAČAJNIJI DOGAĐAJI
7. PROJEKTI
8. USPJESI STIPENDISTA
9. PREDSTAVLJANJE UČENIKA GENERACIJE
10. 26 PONOSA FONDACIJE HASTOR
11. VANNASTAVNE AKTMNOSTI STIPENDISTA
12. PREDSTAVLJANJE POSEBNIH TIMOVA
13. KLUB PRIJATELJA I DONATORA
14. PRIDRUŽITE NAM SE

UVODNA RIJEČ DIREKTORA

Dok se osvrćem na prethodnu, ali i sve ranije godine kontinuiranog postojanja Fondacije Hastor, uviđam kako su se stranice Godišnjeg izvještaja iz godine u godinu samo povećavale i postajale brojnije. To je egzemplaran pokazatelj napretka i uvećavanja sjajne ideje nastale 2006. godine i nazvane Fondacija Hastor. Stranice u nastavku najbolje će pokazati zbog čega je ta ideja trajala sve ove godine i, još važnije, pokazat će kako je skupa s Fondacijom Hastor rastao i broj njenih članova koji svojim radom, trudom i znanjem ispisuju stranice pred nama. Sve priče ispisane na ovim stranicama imaju u svojoj srži jednu riječ – pomaganje. Ona je srž temeljne ideje Fondacije Hastor i razlog zbog kojeg je Fondacija Hastor nastala i opstala sve ove godine kao autentičan primjer u regionu, ali i šire. Pomaganje je naša osnovna ideja-vodilja i put kojim naši stipendisti idu nastojeći pozitivno djelovati na svoju ličnost, ali i okruženje. Program volontiranja u Fondaciji Hastor samo je jedan od primjera koji je nastao inspirisan snagom želje da se pomogne onome kome je potrebna naša pomoć i da se na taj način snažno djeluje na promjene u društvu. Mentorski volonterski rad zamišljen je kao ciklični proces kroz koji se aktivno radi na tome da se kod mladih ljudi još u osnovnoj i srednjoj školi probudi svijest o važnosti razvijanja empatije i suosjećanja s drugim ljudima, ali i važnosti učenja i svakodnevnog stjecanja znanja koje je naše najsnažnije oružje. Tako se evo već 16 godina kreiraju generacije mladih ljudi koji jedni na druge prenose pozitivne promjene, koji jedni s drugima sarađuju i tako ujedinjeni djeluju u društvu, što je naša najsnažnija pokretačka snaga da nastavimo rasti i, uz nesebičnu pomoć naših prijatelja, povećavati broj stipendista Fondacije Hastor.

S godinama se oko nas kreirao krug uspješnih priča, uspješnih ljudi, krug pobjeda i prevaziđenih izazova, krug osmijeha i inspirativnih primjera i sve to je postalo obilježje Fondacije Hastor, njenih članova i prijatelja.

Zbog svega navedenog moram istaknuti kako članstvo u Fondaciji Hastor sa sobom nosi mnoštvo izazova i odgovornosti, no godine iza nas, a i ove stranice pred nama, pokazatelj su da su naši stipendisti i više nego svjesni te odgovornosti i da to svojim djelovanjem svakodnevno nastoje i pokazati.

Čini me sretnim da mogu kazati da je Fondacija Hastor u prethodnih 16 godina iznjedrila veliki broj mladih ljudi koji su svojim djelovanjem uspjeli u velikoj mjeri utjecati na svoje zajednice i doprinijeti njihovom razvitku i napretku. To je posebno vrijedno kada se u obzir uzme činjenica da Fondacija Hastor djeluje u čak 135 općina na području Bosne i Hercegovine i da iz tih općina okuplja najuspješnije mlade ljude i podstiče ih na stjecanje znanja, empatiju, dijeljenje i pomaganje. Ti mladi ljudi postaju inspiracija kako svojim zajednicama tako i Fondaciji Hastor da nastavi pričati njihove priče o radu, trudu i maksimalnom zalaganju na svim poljima. Oni su naša najbolja definicija i s potpunom sigurnošću, ali i velikim ponosom, mogu kazati da su njihova marljivost i dobrotu najveći orden Fondacije Hastor, njihova su djela najsajnija iskra koja će nesumnjivo širiti svoj sjaj i na one koji će tek doći.

Program volontiranja samo je jedan od pokazatelja moći dijeljenja i prenošenja znanja među mladim ljudima, jer godinama unazad stipendisti Fondacije Hastor jedni s drugima dijele svoja znanja i iskustva pokazujući kako time ona postaju samo veća i kako tek tada, kada budu podijeljena, dobiju svoj istinski smisao. Baš zbog toga svaki put s iznimnom srećom gledamo kako su stipendisti Fondacije Hastor nerijetko najuspješniji učenici u osnovnoj i srednjoj školi i dobitnici su najvećih priznanja kao studenti na svojim fakultetima. Znamo da su oni kao takvi najbolji ambasadori ideje Fondacije Hastor i da će svoje znanje nesebično dijeliti s drugima svjesni moći toga dijeljenja.



Seid Fijuljanin

O NAMA

Vođena centralnom idejom da je obrazovanje izbor pobjednika, Fondacija Hastor je neprofitna organizacija koja aktivno djeluje na području čitave Bosne i Hercegovine još od 2006. godine, kada je počela s ostvarivanjem misije osnaživanja mladih i ambicioznih ljudi koji su pokretači pozitivnih promjena u društvu. Fondaciju Hastor karakteriše jedna riječ koja za svakog stipendistu ima posebno značenje – pomaganje. Pomaganje kao takvo se ispoljava kroz mnogobrojne volonterske sate koje naši stipendisti provode na različite kreativne i za društvo korisne načine, što u njima budi osjećaj za društvenu

odgovornost. Kao što pčele radilice vrijedno prikupljaju cvjetni polen kako bi sve zajedno u šupljini drveta proizvele med tako i svi stipendisti Fondacije Hastor svojim volonterskim angažmanom i uložnim trudom i vremenom doprinose čitavom bosanskohercegovačkom društvu u izgradnji kvalitetne i prosperitetnije sredine pogodne za napredovanje i razvijanje korisnih vještina.


Fondacija Hastor je godinama usmjerena na sakupljanje finansijskih i ljudskih resursa u cilju njihovog usmjeravanja u, prvenstveno, obrazovanje, a zatim i u usučivanje filantropskih i altruističkih ideja koje nesumnjivo posjeduju svi njeni članovi. Kroz mnogobrojne sastanke tokom cijele godine Fondacija Hastor održava vezu sa svojim stipendistima koji na svakom sastanku nauče nešto novo i korisno i na taj način obogaćuju svoju riznicu znanja, a to znanje prenose i na osobe u svome okruženju.

Broj stipendista munjevitro raste iz godine u godinu, što svjedoči tome da Bosna i Hercegovina svakom novom godinom dobija obrazovane mlade ljude koji su motivisani da svoj trud, znanje i ambicije iskoriste kako bi učinili nešto dobro za svoju zajednicu dok istovremeno uz sebe imaju Fondaciju Hastor koja ih bodri na njihovom putu obrazovanja. Pored mnogobrojnih beneficija koje steknu kao stipendisti, pripadanje jednoj zajednici kakva je Fondacija Hastor za mnoge predstavlja nešto najljepše što im se dogodilo u toku školovanja, a brojna prijateljstva koja ostaju čak i nakon okončanja školovanja pokazatelj su da se Fondacija Hastor ističe ne samo po pomaganju nego i po dobrim međuljudskim odnosima koji po mnogim faktorima podsjećaju na porodične odnose pune ljubavi i lijepih osjećanja.



PROCES ODABIRA STIPENDISTA

Fondacija Hastor tokom cijele godine prima molbe za stipendiranje od strane učenika osnovnih i srednjih škola u Bosni i Hercegovini, kako pismeno, tako i elektronskim putem (preko online obrasca na web- stranici Fondacije Hastor). Molbe sadrže kontakte aplikanta, kratak opis socio-ekonomskih uvjeta u kojima žive aplikanti, kao i informacije o postignutom uspjehu u školi. Obrada pristiglih molbi vrši se jednom godišnje, u periodu februar/mart, nakon čega se aplikantima šalje zahtjev koji trebaju popuniti skupa s pratećom dokumentacijom koja može posvjedočiti o iskazanoj ekonomskoj situaciji i ostvarenom školskom uspjehu. Prikupljeni podaci se unose u softver koji automatski kreira rang listu kandidata. Nakon toga, tim Fondacije Hastor posjećuje kandidate s najvećim brojem bodova. Nakon izvršene provjere stanja na terenu, stipendije se dodjeljuju određenom broju kandidata u ovisnosti od predviđenog budžeta za datu školsku godinu. Studenti mogu postati stipendisti Fondacije Hastor ukoliko Fondacija objavi javni konkurs za prijem novih studenata. Konkurs za studente se objavljuje krajem godine. Prijavlivanje na konkurs se vrši isključivo online prijavom bez dostavljanja dokumentacije. Softver automatski kreira rang listu kandidata na osnovu uspjeha na fakultetu te ekonomske situacije u porodici. Kandidati s najvećim brojem bodova bivaju pozvani na intervju s članovima Komisije za dodjelu stipendija.



16 GODINA KONTINUIRANOG POSTOJANJA I DJELOVANJA FONDACIJE HASTOR

Norman Vincent Peale jednom je kazao kako „ljudi postanu zaista nevjerovatni kada počnu misliti da mogu postići stvari. Kada vjeruju u sebe imaju prvu tajnu uspjeha.“ Fondacija Hastor već 16 godina djeluje i radi vjerujući u ove riječi i ulažući u mlade i ambiciozne ljude čiji se broj iz godine u godinu znatno povećava. Od početka svoga djelovanja pa sve do danas Fondacija Hastor je podijelila 22.000 stipendija mladim ljudima kojima je osim finansijske potpore pružila priliku da napreduju, da upoznaju svoje vršnjake i kroz rad s njima šire svoje vidike i, ono najvažnije, pružila im je bezuvjetnu podršku na njihovim putevima.

Njeno djelovanje i rad s vremenom je sve više i više nalikovalo drvetu koje je te 2006. godine posadila nekolicina pojedinaca te ga mladog i nerazgranatog prepustila vremenu s ciljem da koristi ljudima. Drvo nije izdalo svoju misiju, godinama su njegove grane bivale sve gušće i korijeni jači, godinama je ono davalo svoje plodove koji su uistinu, gotovo u svim mogućim segmentima, koristili društvu. U svakome od njih se bez sumnje prepoznaje da je rastao i sazrijevao na granama ovog snažno ukorijenjenog drveta koje iz godine u godinu jača i ne prestaje širiti svoje grane. Njegove grane danas su proširene na 135 bosanskohercegovačkih općina, Fondacija Hastor okuplja mlade ljude iz tih općina dajući im podršku i potporu na njihovom putu ka sazrijevanju i uspjehu. Ona je bila ta koja je vjerovala u to da ljudi postaju nevjerovatni „kada počnu misliti da mogu postići stvari“ i usmjeravala je ove mlade ljude podstičući ih da u svome životu i radu uvijek gledaju naprijed i vjeruju u svoje mogućnosti.

Jedan od segmenata djelovanja Fondacije Hastor, odnosno njen najvažniji segment djelovanja svakako je volontiranje. Od 2006. godine pa do danas pod okriljem njenog imena obavljeno je 1.500.000 sati volontiranja i taj broj neprestano, iz dana u dan i iz godine u godinu značajno raste. Njegovi rezultati su potvrda da to nije samo cifra ispisana na papiru nego svjedočanstvo promjene i napretka, od najmanjeg do najvećeg oblika. Upravo je zbog toga Fondacija Hastor jedna od najautentičnijih organizacija u regionu. Njen je cilj da gradi kvalitetnije društvo podstičući i unapređujući pritom najvažniji sloj toga društva – mlade ljude.

Najbolja potvrda da je put kojim je Fondacija Hastor izabrala kročiti i djelovati na promjenu u našem okruženju svakako su uspjesi njenih stipendista na njihovim fakultetima, brojnim takmičenjima, u njihovim lokalnim zajednicama te na onom najvažnijem planu – u njima samima. Zadovoljstvo je vidjeti da u Fondaciju Hastor uđu mladi ljudi spremni raditi na sebi i unapređivati svoje sposobnosti, kroz nju se grade, a iz nje u svijet izađu stasali i samouvjereni inženjeri, učitelji, ekonomisti, doktori... koji su odgajani na temeljima empatije i filantropije. Svih 100.000 km pređenih u potrazi za novim stipendistima tada dobije jedan drugačiji smisao i postane vodilja i podsticaj za njihovo dalje djelovanje. Onoga trenutka kad oni, takvi kakvi jesu, kroče u svijet Fondacija Hastor dobije potvrdu da je njen cilj i njen put ispravan i da će se zahvaljujući tome putu i tome cilju njene grane nastaviti širiti, njeni korijeni nastaviti jačati i da će njeni plodovi, kako je nekad davno i zamišljeno, nastaviti koristiti društvu i okruženju u kojem se nađu.

Danas sa zadovoljstvom možemo kazati da smo ponosni na svih 22.000 podijeljenih stipendija i 135 općina djelovanja, ponosni smo na naših 1.500.000 sati volontiranja i 100.000 km pređenih u potrazi za onima zbog kojih naš rad dobija potpuni smisao i svrhu. To za nas nisu samo brojke, u njima su utkani ljudi koji su ih činili, utkana je snažna volja i trud na putu obrazovanja i samo-unapređenja, suosjećanje i ambicija i, najvažnije, u ovim brojkama utkana je ljubav prema onome što se punih 16 godina radilo i uradilo pod zastavom Fondacija Hastor.



REZULTATI I USPJEHI 2021/2022

135
OPĆINA

600
OBRAZOVNIH
INSTITUCIJA

2586 BIVŠIH
STIPENDISTA

350 000
VOLONTERSKIH
SATI

108
DIPLOMANATA I
MAGISTRANATA

367
SUPERODLIKAŠA

891
ODLIKAŠA

VIŠE OD 2220
STIPENDISTA

NAJZNAČAJNIJI DOGAĐAJI

Potpisani ugovori o stipendiranju učenika osnovnih i srednjih škola

Fondacija Hastor nastavlja provoditi brojne aktivnosti. Jedna od njih koja je posebno dragocjena i važna je i potpisivanje ugovora o stipendiranju s učenicima stipendistima Fondacije Hastor. Tim činom Fondacija Hastor potvrđuje staru narodnu izreku koja kaže kako dobar početak čini dobar kraj, a koji drugi kraj može biti ljepši od obnavljanja ugovora sa starim i dodjeljivanje prvih ugovora novim stipendistima. S druge strane, kraj školske godine za neke stipendiste znači kraj formalne veze s Fondacijom Hastor zbog okončanja njihovog školovanja. No, većina naših stipendista i dalje nastoji održati dugogodišnju nit koja ih je snažno vezala za Fondaciju Hastor te njihov afirmativan rad ne prestaje okončanjem statusa stipendiste. Takva praksa je pokazatelj da se neke uspomene i ljudi ugnijezde u naša srca zauvijek, to onda postaje neraskidiva veza koja se godinama čuva i njeguje – baš ovakvu vezu Fondacija Hastor iz godine u godinu nastoji graditi sa svojim stipendistima. Pored svega navedenog, naša Fondacija je jedna od rijetkih koja stipendira učenike i studente iz cijele Bosne i Hercegovine kroz svih dvanaest mjeseci u godini, stoga je potpisivanje ugovora za učenike osnovnih i srednjih škola bio dugotrajan proces koji je podrazumijevao odlazak u mnoge gradove i mjesta u našoj domovini. S ponosom možemo kazati da stipendiju Fondacije Hastor primaju učenici i studenti iz čak 135 općina i gradova Bosne i Hercegovine. Svi ovi gradovi imaju svoje predstavnike, marljive učenike koji će u narednoj godini biti ponosni stipendisti Fondacije Hastor.

Potpisivanjem ugovora o stipendiranju stipendisti se obavezuju da će biti marljivi i uzorni učenici te da će svakodnevno nastojati razvijati empatiju prema drugim ljudima u svome okruženju. Na taj način svi oni već u ranom dobu nauče važnost pomaganja onima koji tu pomoć trebaju, a to je jedan od najvažnijih ciljeva Fondacije Hastor. Također, učenici stipendisti bit će u prilici svoje volonterske sate kvalitetno provoditi sa svojim mentorima razgovarajući o brojnim temama koje su aktuelne i važne za današnjicu. Na taj način Fondacija Hastor je napravila ciklični krug u kojem svako može doprinosti svakoj jedinki ponosob i tako demonstrirati i jačati filantropsku ideju naše Fondacije. Neosporna je činjenica da su nekadašnji stipendisti Fondacije Hastor, koji su istu krasili od njenog osnivanja 2006. godine, danas uspješni mladi ljudi koji svojim angažmanom nastavljaju doprinosti društvu. Kroz potpisane ugovore i filantropsku ideju Fondacija nastavlja živjeti svoju temeljnu zadaću – da obrazovanje bude izbor pobjednika. Nadamo se da će trenutni stipendisti Fondacije Hastor također nastaviti doprinosti na tom polju te da će u jednakoj mjeri biti uspješni kao brojni dosadašnji mladi ljudi koje je iznjedrila Fondacija, a koji su nastavili biti naš ponos tokom 16 godina postojanja i razvoja.



NAJZNAČAJNIJI DOGAĐAJI

Potpisani ugovori o stipendiranju studenata iz cijele Bosne i Hercegovine

Kraj 2021. godine za Fondaciju Hastor i studente stipendiste predstavlja početak jedne nove priče i novih avantura u koje će se naši vrijedni stipendisti upustiti. Preko 500 studenata stipendista Fondacije Hastor potpisalo je ugovore. Iako podijeljeni u grupe, uz poštivanje svih epidemioloških mjera, studenti stipendisti su nakon dugo vremena bili ponovo na okupu.

Uprkos mjesečnim online sastancima koji su na određeni način ipak pružali osjećaj zajedništva, studenti stipendisti nisu krili sreću zbog konačnog okupljanja uživo. Baš kao i na mjesečnim sastancima, studente stipendiste je dočekao uvijek dobro raspoložen direktor Fondacije Hastor Seid Fijuljanin koji je uputio čestitke svim studentima i studenticama na potpisanim ugovorima te ih motivirajući riječima podstaknuo da nastave nizati svoje uspjehe.

Naši studenti su prvenstveno uzori mlađim stipendistima koje, kroz proces mentorstva, potpomažu kako bi i oni vremenom postali baš kao i svoji mentori. Direktor Fijuljanin je dodao da je način na koji studenti stipendisti motiviraju i inspiriraju mlađe stipendiste ključan i da će zahvaljujući tome oni izabrati da im njihovi mentori na neki način budu „role model“. Pored svakodnevnih tema koje studenti stipendisti obrađuju sa svojim mentorskim grupama, važno je da učenici steknu izvjesno povjerenje prema svojim mentorima te da znaju da im se bilo kada mogu obratiti i potražiti pomoć od njih. Volontiranje u mentorskim grupama i lokalnim zajednicama predstavlja jednu od osnovnih karakteristika Fondacije

Hastor prema kojoj smo prepoznatljiviji drugima. Naši stipendisti mjesečno obave više od 20 000 sati volontiranja koji su značajni i za čitavu Bosnu i Hercegovinu.

Direktor Seid Fijuljanin najavio je konkurs za prijem novih studenata stipendista koji će postati naša mala vojska pozitivnih promjena i koji će zajedno s ostalim stipendistima biti uzor čitavom regionu. Studenti stipendisti su se pokazali izuzetno odgovornim kada su u pitanju njihove obaveze prema fakultetskim zadacima, ali i prema Fondaciji Hastor koja ih svakodnevno inspiriše da u svemu što rade budu izuzetno uspješni, a prije svega dobri ljudi koji svojim pozitivnim društvenim djelovanjem mijenjaju zajednice i postaju uzor mladima u Bosni i Hercegovini. O njihovim obavezama prema Fondaciji Hastor studente je uputila bivša stipendistica Maida Husnić koja je članica administrativnog tima i pojasnila je osnovna pravila i način funkcionisanja same Fondacije.

Od samog osnivanja 2006. godine Fondacija Hastor svojim radom podržava i osnažuje mlade s ciljem da svaki stipendista nakon okončanja školovanja postane odgovoran, vrijedan i inspirativan građanin ove države koji će svojim društvenim angažmanom biti pokretač promjena, prvenstveno u svojim lokalnim zajednicama, a nakon toga i u čitavoj Bosni i Hercegovini. Potpisivanje ugovora sa studentima stipendistima uvijek nas opominje da će upravo ti stipendisti vrlo brzo kročiti u svijet tržišta rada, ali to nas ne rastužuje, naprotiv, sretni smo što će poslodavci vrlo brzo imati priliku da upoznaju ove divne mlade ljude i sigurni smo da će nas učiniti izuzetno ponosnim.

“

Ako bih morao da u jednoj riječi sublimiram šta je to misija Fondacije Hastor, mislim da bi najprikladnija riječ bila pomaganje, što i jeste naša suština. Svi naši stipendisti od osnovne i srednje škole i na kraju do fakulteta prolaze kroz razne staze koje ih vode do ispunjavanja njihovih ličnih ciljeva i ambicija, a pritom im je stil, način života i rada pomaganje kao jedna od glavnih karakteristika. Studenti stipendisti u misiji Fondacije Hastor su kamen-temeljac, najbitniji stub u njenom funkcionisanju jer su oni ti koji rade s osnovcima i srednjoškolcima i predstavljaju im na neki način uzor koji će slijediti, rekao je direktor Fijuljanin.



PROJEKTI

Fondacija Hastor i holandska organizacija Stichting Kinderhulp Bosnie nastavili sa provedbom projekta Ljetni raspust u Holandiji

"Ljetni raspust u Holandiji" jedan je od projekata koje Fondacija Hastor u saradnji s holandskom partnerskom organizacijom „Stichting Kinderhulp Bosnie" organizira već dugi niz godina. Ovaj projekt je poseban jer djeci iz ruralnih područja slabijeg ekonomskog stanja pruža priliku da posjete zemlju lala i vjetrenjača te steknu lijepa iskustva i kreiraju uspomene za čitav život. Ovogodišnju izabranu grupu djece pratile su naše stipendistice Amela Džidić i Amina Zorak za koje je ovo putovanje bilo izazov i avantura s koje su se vratile s pregrštima lijepih sjećanja o kojima možete čitati u nastavku teksta.

Amela dodaje i kako je, osim u samom putovanju, uživala i u pripremi istog s obzirom na to da se u tom periodu upoznala s djecom i njihovim roditeljima, što su joj, kako kaže, bili posebno emotivni trenuci. Iako je ovo putovanje jedinstvena prilika za djecu da upoznaju jednu novu državu, steknu nova poznanstva te prošire svoje vidike, ipak im nije lahko odvojiti se od svojih roditelja kao što ni samim roditeljima nije baš tako jednostavno ispratiti ih u njihovu avanturu pa se na dan putovanja na njihovim licima vidjela i pokoja suza koja je ođavala osjećaj radosti i potajne tuge. Prava avantura za Aminu, Amelu i naše male putnike počela je 11. juna kada su stigli u Holandiju. Sav umor od puta je nestao i bili su spremni da hrabro i entuzijastično zakorače u svoju zemlju čuda i da svoje knjige uspomena ispišu lijepim iskustvima. Holandske porodice kod kojih su djeca trebala biti smještena spremno i uzbuđeno su dočekale naše male avanturiste.

Jedan od najemotivnijih i, za svaku našu ekipu koja je godinama unazad posjećivala Holandiju, najtužnijih trenutaka svakako je rastanak od novostečenih prijatelja i kraj avanture. Iza njih ostaje lijepo i nezaboravno iskustvo, a ispred njih je put njihovim domovima i roditeljima.

Jedan od najemotivnijih i, za svaku našu ekipu koja je godinama unazad posjećivala Holandiju, najtužnijih trenutaka svakako je rastanak od novostečenih prijatelja i kraj avanture. Iza njih ostaje lijepo i nezaboravno iskustvo, a ispred njih je put njihovim domovima i roditeljima.

Sretni smo da iz godine u godinu dobijamo sve ljepše, sadržajnije, ali i emotivnije izvještaje o realizaciji projekta „Ljetni raspust u Holandiji". Posebno se radujemo dječjim osmijesima i radosti zbog svega

onoga što su imali priliku vidjeti dok svojim roditeljima prepričavaju svoja putovanja. Fondacija Hastor se time utkala u njihova djetinjstva, provukla kroz njih nit sreće i ostala u njima zauvijek. To su naši najveći uspjesi i neizmjeramo smo ponosni na svaki od njih jer su posebni i posebno ih negujemo. Fotografije koje smo dobili s ovog, ali i svih ostalih putovanja u Holandiju čuvamo i baštinimo kao najveće bogatstvo. Na njima se vide ispunjene želje, iskrena dječija radost, prijateljstvo i ljubav – jednom riječju Fondacija Hastor.



Općina Novi Grad Sarajevo podržala realizaciju projekta „Podrška obrazovanju učenika i studenata u stanju socijalne potrebe“

Fondacija Hastor je kroz krug svojih saradnika i, slobodno se može kazati, prijatelja koji njeguju iste vrijednosti kakve i ona godinama pokazuje i baštini primjer kako se zajednički može postići mnogo više nego što to možete učiniti sami. To se djelimično oslikalo i kroz realizaciju projekta „Podrška obrazovanju učenika i studenata u stanju socijalne potrebe“ koji se uspješno provodi uz podršku Općine Novi Grad Sarajevo koja je prepoznala značaj postojanja jedne zajednice kakva je Fondacija Hastor za mlade ljude ove zemlje.

Općina Novi Grad Sarajevo donirala je sredstva u iznosu od 4.000,00 KM koja će u vidu stipendija biti raspoređena stipendistima Fondacije Hastor koji su u stanju socijalne potrebe i kojima će se na ovaj način u mnogome olakšati njihov put obrazovanja i napretka. Inače, mjesečna stipendija za osnovce iznosi 100,00 KM, a za srednjoškolce 150,00 KM te će donirana sredstva obezbijediti 4 mjesečne stipendije za ukupno 8 stipendista, tačnije 4 osnovca i 4 srednjoškolca. Podrška Općine Novi Grad Sarajevo u realizaciji ovog projekta iznimno je važna kao pokazatelj koliko je bitno da kao društvo zajedno djelujemo i na mnoge načine pomažemo mlade ljude u našoj zemlji. Ciljevi saradnji ovakve vrste su podsticajni i inspirativni s obzirom na to da su usmjereni na osnovce i srednjoškolce koji će u budućnosti, po uzoru na nas, nastojati raditi isto i pri tome razvijati zajednicu pomažući drugima.

Na ovaj način Fondacija Hastor želi zahvaliti Općini Novi Grad Sarajevo na pruženoj podršci u realizaciji spomenutog projekta čiji je osnovni cilj izmamiti osmijehe na lica naših stipendista koji su u stanju socijalne potrebe i osigurati im neophodnu pomoć. U konačnici, možemo kazati kako nas posebno raduje činjenica da je ovom saradnjom mreža prijatelja Fondacije Hastor postala šira i bogatija te činjenica da će iza nas ostati još jedan u nizu uspješno realiziranih projekata čiji je fokus usmjeren na mlade ljude, njihov razvoj i podsticaj.



Općina Novi Grad Sarajevo



Obrazovanje - izbor pobjednika!

PODRŠKA OBRAZOVANJU UČENIKA I STUDENATA U STANJU SOCIJALNE POTREBE

REALIZACIJU PROJEKTA PODRŽALA OPĆINA NOVI GRAD SARAJEVO

Pravni okvir za filantropiju

Filantropija je u našoj državi kompleksna i fragmentirana oblast koja ranije nije bila predmet obimnih analitičkih i zagovaračkih aktivnosti, pa su u sklopu početnih aktivnosti projekta „Pravni okvir za filantropiju“ objavljene dvije publikacije, koje predstavljaju značajan doprinos razumijevanju ove oblasti. *Riječ je o Početnoj analizi zakonskog okvira u Bosni i Hercegovini u oblasti filantropije, kao i Analizi percepcija pravno-institucionalnog okvira, koje nude uvid u ovaj kompleksan sistem.*

Na osnovu ovih analiza su izrađene preporuke za unapređenje pravnog okvira radi razvoja i osnaživanja filantropije u Bosni i Hercegovini te je odabrano 6 prioriteta za razvoj dobročinstva, od kojih su 4 prioriteta u trenutnoj fazi implementacije projekta otvorena i intenzivno se radi na njihovom rješavanju. S tim u vezi, dosad su formirani tematski zagovarački timovi, koji se bave pitanjima definisanja pojmova važnih za filantropiju (donacije, aktivnosti za opšte dobro, humanitarna djelatnost), online donacija organizacijama civilnog društva, oslobađanja donacija hrane pred istekom roka od plaćanja PDV-a te oporezivanja grantova nevladinim organizacijama.

Na temu oslobađanja donacija hrane pred istekom roka od plaćanja PDV-a u toku je provođenje kampanje „Niko gladan. Niko sam.“, a spomenuta inicijativa je dobila podršku Komisije za finansije i budžet Zastupničkog doma Parlamentarne skupštine BiH, u smislu donošenja Zakona o izmjenama i dopunama Zakona o porezu na dodanu vrijednost, koje se odnose na ukidanje PDV-a na doniranu hranu, što znači da je napravljen još jedan značajan iskorak ka omogućavanju većeg doniranja hrane. U okviru ove kampanje prvi put je organizovana konferencija koja je okupila predstavnike svih javnih kuhinja u našoj državi, a čiji je cilj bio dogovoriti pravce i korake za uspostavu transparentnog lanca doniranja hrane oslobođene od plaćanja PDV-a, od kompanija do krajnjih korisnika i korisnica.

Program „Pravni okvir za filantropiju“ provodi Fondacija Mozaik zajedno sa partnerskim organizacijama (Fondacija Hastor, Udruženje Pomozi.ba, Mreža za izgradnju mira, Fondacija Trag i Catalyst Balkans) uz finansijsku podršku USAID-a. U okviru istog programa osnovan je Filantropski forum koji okuplja kompanije i fondacije u BiH s ciljem ujedinjavanja dobra kroz strateška davanja.

Filantropski forum

Kao jedinstvena platforma čije se djelovanje zasniva na strateškom pristupu koji podrazumijeva udruživanje filantropskih snaga kroz moto „Ujedinjujemo dobro“, Filantropski forum je u svojim počecima djelovanja aktivnosti zasnivao na širenju mreže članica i partnera, kako bi se kroz djelovanje tri stuba – kompanije, fondacije ili udruženja (koja najmanje 30% prihoda daju trećim licima u vidu novčane pomoći kroz grantove, stipendije i sl.) i individualni filantropi, kreirao stabilan ekosistem za filantropiju.

Kroz dosadašnje djelovanje Filantropskog foruma kreirana je jaka mreža članica iz svih kategorija, koje žele učestvovati u izgradnji jakog ekosistema filantropije. Među članicama i partnerima se nalaze pravna i fizička lica kojima je filantropija ukorijenjena u principe poslovanja te koji održavaju radno okruženje i međuljudske odnose zasnovane na dostojanstvu i poštovanju, jer želimo da sve aktivnosti Filantropskog foruma budu čvrsto utemeljene na vrijednostima i principima plemenitosti, ljudskosti, časti, povjerenja i integriteta.

Posvećenost Filantropskog foruma ispunjenju vizije, misije i ciljeva prepoznata je od strane Sarajevo Business Forum, koji je u 2022. godine Filantropski forum nagradio prestižnim priznanjem „Sarajevo Business Bridge Awards“ u kategoriji „Social Impact“, što predstavlja značajnu motivaciju za dalje korake i maksimalno zalaganje u ispunjenju ciljeva usmjerenih na stvaranje održive filantropske zajednice koja doprinosi društvenoj promjeni.

Filantropski forum

Filantropski forum dobitnik prestižnog priznanja „Sarajevo Business Bridge Awards“ u kategoriji „Social Impact“

Filantropski forum kroz moto „ujedinjujemo dobro“ od prvog dana svog osnivanja nastoji da stvori perspektivniju budućnost našeg društva, stoga smo veoma ponosni što su naša vizija, misija i ciljevi, ali i naš trud i posvećenost, prepoznati od strane Sarajevo Business Forumu koji nam je ove godine dodijelio prestižno priznanje „Sarajevo Business Bridge Awards“ u kategoriji „Social Impact“.

U okviru 11. Sarajevo Business Forumu ovogodišnjim dobitnicima priznanja su uručili predsjednik Uprave Bosna Bank International Alek Bakalović i ostali članovi žirija: bivši predsjednik Republike Hrvatske Stjepan Mesić, bivši premijer Republike Sjeverne Makedonije Zoran Zaev, a naročito je zadovoljstvo što je među ljudima koji su učestvovali na dodjeli nagrade bio i gospodin Nijaz Hastor, vlasnik i osnivač ASA Group, Prevent Group CEE i Fondacije Hastor. U ime Filantropskog foruma nagradu je primila izvršna direktorica Tatjana Vučić, a dodjeli je prisustvovao i Seid Fijuljanin, predsjednik Upravnog odbora Filantropskog foruma i direktor Fondacije Hastor.



USPJESI STIPENDISTA

Umjetnost kao prostor uspjeha i zadovoljstva – stipendistica Ajna Šido osvojila prvo mjesto na likovnom takmičenju

Umjetnost je sigurno jedan od svjetova u koji mladi ljudi rado zakoraču i kojem posvećuju veliku pažnju. Njen značaj i posebnost prepoznati su još u davnim vremenima, a umjetnici su oduvijek bili oni koji su stvarnost gledali drugačijim očima. Aristotel je jednom kazao kako „cilj umjetnosti nije da predstavi vanjsku pojavnost stvari, nego njihov unutarnji značaj“, a naša stipendistica Ajna Šido je, vodeći se upravo tom mišlju, zakoračila u svijet likovne umjetnosti, nastojeći vidjeti suštinu onoga što je pred njom te kroz sliku to prenijeti i na ostale. Ajna pohađa deveti razred Osnovne škole „Jajce“ Kruščica, odlična je učenica i stipendistica Fondacije Hastor već pet godina. Svoje slobodno vrijeme iskoristava pišući tekstove i crtajući likovne radove, a počela je pisati i vlastitu knjigu na engleskom jeziku pod nazivom A journey without return. Njen uspjeh primjetan je i na polju likovne umjetnosti. Ajnin rad na temu „Heroji u bijelom na prvim borbenim linijama u ratu i miru“ bio je odabran kao jedan od dva koja će se poslati na takmičenje iz njene škole te je zahvaljujući istom osvojila prvo mjesto.

“

U trenutku kada sam saznala da sam osvojila prvo mjesto, nisam vjerovala u to što čujem. Bila sam jako uzbuđena i sretna jer sam ostvarila takav uspjeh, a najviše sam bila ponosna na sebe jer sam baš ja pobijedila te predstavila našu školu na najbolji mogući način.

Ajna ističe da i nije baš od onih osoba koje vole da se takmiče, ali dodaje i da, kada je likovna umjetnost u pitanju, rijetko izdrži da se ne prijavi i pošalje svoj rad. Vrijedi spomenuti i to da je Ajnino prvo takmičenje bilo u osmom razredu – takmičenje je organizirala Fondacija Hastor, a Ajna je osvojila treće mjesto. Kaže kako je poslije toga bilo još takmičenja na kojima je učestvovala i ostvarivala dobre rezultate, ali da ovo pamti kao prvo i posebno.

“

Fondacija Hastor je te godine organizirala takmičenje za svoje stipendiste i učestvovali su stipendisti iz čitave Bosne i Hercegovine, a meni je bila čast da sam od toliko učesnika baš ja osvojila treće mjesto u kategoriji za osnovne škole. To je bilo veliko zadovoljstvo i kad bi me sada pitali koje takmičenje mi najviše znači, to bi sigurno bilo takmičenje u organizaciji Fondacije Hastor.

Od velike je važnosti da mladi budu svjesni koliko umjetnost danas znači našem društvu i kakvu ulogu ima. Drago nam je i ponosni smo što naši stipendisti svakodnevno prepoznaju tu važnost i rade na afirmaciji umjetnosti na razne načine. Ajna je na svom primjeru pokazala kako umjetnost može biti i polje na kojem nižemo uspjehe, ali i prostor koji nam pruža odmor i zadovoljstvo.



USPJESI STIPENDISTA

Perspektivna sportistkinja Ajna Ćosić-Kurtiš

Da je rečenica „Pobjednici moraju imati dvije stvari: određene ciljeve i snažnu želju za njihovim postizanjem.“ apsolutno tačna govori rad i djelovanje stipendistice Fondacije Hastor Ajne Ćosić-Kurtiš. Ajna je osmi razred Osnovne škole „Meša Selimović“ u Sarajevu i ima 13 godina. Stipendistica Fondacije Hastor je već dvije godine zahvaljujući svom predanom i marljivom radu u pogledu školskih obaveza, ali i u sferi vannastavnih aktivnosti. Iako joj je hemija najdraži predmet u osnovnoj školi, njena najveća ljubav je karate. Naša Ajna karate trenira već punih pet godina. Od samog početka, istakla se u navedenom sportu, što joj je davalo dodatnu motivaciju i želju za rastom i razvijanjem te je pet godina kasnije postigla zapažena rezultate i na ovom polju. Poslije napornog dana provedenog u školi i izvršavanja drugih školskih aktivnosti redovno, bez izostajanja, trenira karate. Upravo je kontinuitet vježbanja doveo Ajnu do brojnih plasmana, a nas učinio ponosnim što u svojoj porodici imamo ovako vrijednu i požrtvovanu djevojčicu.

Tokom petogodišnjeg aktivnog treniranja karatea Ajna je dospjela do plavog pojasa, a na polaganju je odnijela prevagu među svim takmičarima i bila je najbolja na istom. Njena discipliniranost, marljivost, redovnost i želja za napredovanjem dovela je do toga da je Ajna dobila titulu perspektivnog sportiste od strane Ministarstva za kulturu i sporta Kantona Sarajevo. Ovom veoma važnom priznanju prethodilo je Ajnino učešće na različitim vrstama takmičenja – kantonalnog, državnog te federalnog, na kojima je osvajala zapažene rezultate.

Na Kantonalnom prvenstvu Ajna je postala viceprvakinja u kategoriji borbe -39 kilograma. Također, zabilježila je odlične nastupe na Federalnom i Državnom karate prvenstvu, gdje je ostvarila plasman na peto mjesto i bila na korak od poziva u dječiju karate reprezentaciju Bosne i Hercegovine.

Pored toga, Ajna je nedavno učestvovala u „Vogošća Open 2021“, na kojem je osvojila prvo mjesto. Veliku zahvalnost, kako ističe, duguje svom treneru Anelu Zukanu, jer da nije bilo njega, njegovog truda i strpljenja na treninzima i takmičenjima, Ajna smatra da ne bi mogla postići sve što jeste do današnjega dana sa samo 13 godina. Međutim, veliku zahvalnost Ajna smatra da duguje i Fondaciji Hastor kazavši sljedeće:

“

Ovom prilikom želim da se zahvalim Fondaciji Hastor na neizmjerne podršci i motivaciji koje mnogo znače meni kao stipendistici. Pored materijalne podrške koja u teškim vremenima zaista predstavlja mnogo za mene, ipak mi je bitnija nematerijalna, ljudska podrška koju dobijamo od Fondacije Hastor, a koja sve nas stipendiste motiviše da se dalje razvijamo i profiliramo u onome što nas zanima i u čemu smo uspješni.

Ajni želimo da nastavi nizati uspjehe u školskom i sportskom angažmanu te da nam i dalje daje razlog da kao njena druga porodica ostanemo neizmjerne ponosni na nju i sve njene uspjehe!



USPJESI STIPENDISTA

Alma Hindić – predstavnica tradicije Bosne i Hercegovine kroz fotografiju


U okviru projekta AGROObjektiv 2021 koji sufinansira Ministarstvo kulture i sporta Kantona Sarajevo, Asocijacija studenata Poljoprivredno-prehrambenog fakulteta raspisala je nagradni fotokonkurs za srednjoškolce i studente. Tema konkursa bila je „Tradicija moga kraja“, a učešće na konkursu je uzelo 70 srednjoškolaca i studenata s prostora cijele Bosne i Hercegovine.

Naša stipendistica Alma Hindić osvojila je drugo mjesto na ovom konkursu. Alma je studentica Poljoprivredno-prehrambenog fakulteta Univerziteta u Sarajevu, Odsjek za prehrambenu tehnologiju. Rođena je u Mostaru, a odrasla u Jablanici, gdje je završila Opću gimnaziju. Za spomenuti konkurs saznala je putem društvenih mreža i s obzirom na to da gaji veliku ljubav prema fotografiji, odlučila se prijaviti. Nakon što je publika putem društvenih mreža izabrala 15 najboljih fotografija i njena se našla među njima te je 13. novembra u prostorijama Dječije kuće Novo Sarajevo na Grbavici otvorena izložba fotografija koje je ocjenjivao tročlani žiri, a Almina fotografija izabrana je kao drugoplasirana.

Slobodno vrijeme voli provoditi u čitanju, učenju novih jezika te upoznavanju tradicija i kultura drugih naroda kroz različite aktivnosti. Posebno interesovanje usmjerila je ka turskom jeziku koji je zavojljela kroz srednjoškolsko obrazovanje. U srednjoj školi isticala se kao uzorna i marljiva učenica, a pored školskih obaveza trenirala je odbojku, folklor i učestvovala u raznim ekološkim akcijama i projektima.

“

Fondacija Hastor je snažno utjecala na izgradnju moje ličnosti. Kada sam se tek uključila u rad Fondacije Hastor 2016. godine kao stipendista, bila sam sramežljiva djevojčica koja je sumnjala u sebe. Kroz određeni vremenski period postajala sam komunikativnija, društvenija i marljivija osoba te sam na volonterskim druženjima razvijala nove vještine kroz rad s djecom, upoznala nove prijatelje s kojima sam u kontaktu ostala i dan-danas i, naravno, na kraju, učinila sam nešto za dobrobit čitave lokalne zajednice.



USPJESI STIPENDISTA

Srebro za Muju Alića na kickboxing takmičenju u Mađarskoj

Na stranicama portala i novina, na slikama sa zlatnim peharima i medaljama, okićeni pohvalama i diplomama; na svakoj strani svijeta i u svakoj sferi nauke i sporta Fondacija Hastor ima svoje članove, pa se s ponosom osvrne na svaki od njihovih uspjeha. Ova fondacija jedna je od rijetkih koja je prepoznala moć mladih, obrazovanih i ambicioznih ljudi i svakodnevno im pruža moralnu i finansijsku pomoć u svim njihovim poduhvatima. Biti član Fondacije Hastor naprosto znači nikada ne koračati sam.

Tako se i ovaj put osvrćemo na postignuća sjajnog mladića čiji rad i trud zaista nadahnjuju i zadivljuju. Mujo Alić je učenik 4. razreda Gimnazije "Dr. Mustafa Kamarić" u Gračanici, a stipendista Fondacije Hastor je već treću godinu. Izvrstan je učenik tokom cijelog svog školovanja, ali i pored stalnog rada na redovnim školskim aktivnostima nalazi vrijeme za sport. Mujo trenira Kung Fu Wu Shu već 2 godine, gdje se takmiči u sandi (kineski kickboxing). Sanda je posebna tradicionalna kineska borilačka vještina koja ne predviđa samo fizičku stranu treninga već i psihološku formu održavanja misli, zdravlja i vitalnosti. Pored toga, Mujo se bavi i klasičnim kickbox-om (K-1, Low kick), a nedavno je u Mađarskoj ostvario značajan uspjeh osvojivši 2. mjesto u K-1 borbama.

No, tu ne staju uspjesi, želje i potencijali ovog talentovanog mladića, jer se pored svega još bavi i aktivizmom. Osim što redovno obavlja svoje volonterske aktivnosti kao stipendista Fondacije Hastor, član je i organizacija "ASUBiH" Gračanica i "Crveni Krst" Srebrenik.

U budućnosti, Mujo se planira fokusirati na još jednu svoju ljubav – informacijske tehnologije. Planira upisati elektrotehnički fakultet i tako ostvariti svoj san. Kaže da se ni pored toga ne kani prestati baviti sportom i aktivizmom, a mi mu u svim daljim planovima i nakanama želimo puno sreće i nadamo se da ćemo još mnogo puta imati priliku pisati o njemu, a njegov trud koristiti kao inspiraciju za lični napredak. Svakako će uvijek i svugdje, gotovo u stopu, njegove uspjehe i uspjehe svih stipendista pratiti njihova Fondacija Hastor, kao što to radi već 15 godina sa hiljadama svojih članova.



USPJESI STIPENDISTA

Uspjesi mlade sportistice Erne Tahirović

Sport je urođena aktivnost u ljudskoj prirodi putem koje se mogu izraziti različite sposobnosti, pa i kreativnost, a samo nebo je granica kada su u pitanju mogućnosti koje pruža. Ova aktivnost se smatra iznadprosječnom mentalnom i tjelesnom angažovanošću, gdje se rezultat ostvaruje brojnim oblicima vježbi i zadataka koji su podložni određenim pravilim za izvođenje. Sport ima utjecaj na zdravstveno-funkcionalnu, intelektualno-radnu, voljno-moralnu i estetsku osobnost svakog čovjeka. Treba istaknuti i društvenu ulogu sporta koja ima za cilj odgojno-obrazovne vrijednosti. Sportovi omogućuju razvijanje takmičarskog duha kroz različite forme takmičenja što mu daje posebnu važnost. Pojedini bi rekli da je sport način življenja. Ovaj put donosimo priču naše mlade, talentovane sportistice i stipendistice Erne Tahirović. Stipendistica Fondacije Hastor je već četiri godine, a pohađa Mješovitu srednju ekonomsko-ugostiteljsku školu u Travniku.

Svoje slobodno vrijeme posvećuje različitim sportskim aktivnostima, kao što su fudbal i streljaštvo. Osvojila je prvo mjesto na turniru u streljaštvu u kategoriji seniorki. Ljubav prema streljaštvu se rodila kada je imala priliku prisustvovati promovisanju kluba streljaštva u školi. Tada je prvi put imala kontakt s vazdušnom puškom, pa se krajem 2017. godine priključuje samom klubu pohađajući treninge:

U protekloj godini Erna je dobila trofej za najbolju sportisticu u kategoriji juniora na manifestaciji za izbor najboljih sportista u Novom Travniku.

“

Za sport je bitno baš sve. Pored toga što nam omogućuje fizički razvoj, sportom bivamo psihički odmorniji i spremniji susresti se s preprekama u različitim situacijama.

Volontiranjima u Fondaciji Hastor se posebno raduje, jer joj omogućuju učenje novih zanimljivih i korisnih stvari za život. Posebno se raduje svojim kolegama s kojima se može družiti. Uspjela je izgraditi veliku mrežu prijateljstva koja je čini sretnom. Što se tiče budućnosti, Erna planira završiti srednju školu i fakultet. Želi pronaći svoje mjesto pod sretnom zvijezdom u struci i tu se pokazati. Naravno, svoju prvu ljubav neće napustiti.

Za kraj, Erna poručuje:

“

Ako želite postići nešto, potrebno je vrijedno i naporno raditi. Ono što zacrtate sebi, to i ispunite. Ne odlažite, jer vrijeme nema neograničene moći!

“

Takmičenja su u jednom vidu testiranja onoga što si postigao trenirajući, a u drugom prilika za druženje s mladima iz drugih klubova. Posebne uspomene nosim sa druženja u svom klubu. Pobjedu na takmičenju smatram lijepim osjećajem, jer je trud i zalaganje potvrda njene uspješnosti. Ipak, prisutan je skup različitih osjećanja, a najviše je do izražaja došla sreća.



USPJESI STIPENDISTA

Stipendistica Fondacije Hastor Ada Avdagić proglašena za ponos Bosne i Hercegovine u taekwondo-u

Veoma uspješna i ambiciozna Ada Avdagić, članica taekwondo kluba „Sarajevo“, osvajačica je zlatnih i bronzanih medalja i državna je prvakinja u taekwondou, a od 2020. godine proglašena je i olimpijskom nadom Bosne i Hercegovine. Prva je na svjetskoj rang-listi juniorki 2021. godine u kategoriji do 42 kg, a onda je nešto kasnije zauzela i prvo mjesto na rang-listi u kategoriji do 46 kg.

Kako je sve počelo i odakle ljubav prema ovoj disciplini od Ade ćemo saznati u nastavku. Čitajte njenu priču i uživajte!

Kao odgovor na pitanje kako je krenuo njen put ka uspjehu, Ada kaže da je sve počelo slučajno kada je s ocem otišla na jedan probni trening. Iako je već bila aktivna u školi baleta, taekwondo je ipak postao put koji će obilježiti njenu uspješnu sportsku karijeru, ali i cijeli njen život.

Sve je počelo u sedmoj godini moga života kada sam s ocem otišla na jedan probni taekwondo trening, iako sam tada bila već aktivna u školi baleta. Taekwondo me osvojio svojom atraktivnošću, dinamikom i učenjem o samodisciplini. Sve je to ostavilo dubok trag na meni i evo već 10 godina u taekwondou s još većim žarom idem naprijed.

Ada kaže da je bilo veoma teško uskladiti školu i sport, ponajviše zbog čestog odsustva sa školske nastave, ali je s vremenom uz podršku, kako profesora tako i roditelja, naučila kako uskladiti sve obaveze i rasporediti svoje vrijeme na pravi način.

Čovjek se brzo adaptira na procese u kojima se zadesi pa me ova promjena nije spriječila da sport spojim sa svojim obrazovanjem i školskim obavezama, navodi Ada.

Kako je stipendistica Ada kontinuirano i vrijedno trenirala, tako su i takmičenja postajala ozbiljnija i značajnija te je dobila motivaciju da se još više potruži i postane ovo što je danas: ponos Bosne i Hercegovine koji će jednog dana sigurno postati ponos čitave Evrope kada je u pitanju taekwondo. Sa samopouzdanjem nam priča kako jednog dana želi da bude najbolja u svijetu taekwondo-a, za šta je do sada napravila dobar uvod učestvovanjem na evropskim i svjetskim prvenstvima gdje je ostvarila izvanredne rezultate.

Put je težak, popločan uspjesima i padovima, svaki od tih padova moj je vjetar u leđa da nastavim još jača i bolja pa me oni ne ometaju na mom putu ka ostvarenju cilja, a nada u bolje sutra nikad ne umire, posebno u srcu sportaša, zaključuje Ada.

Kada su u pitanju njeni izvanredni rezultati, ističe da su to posebni momenti, momenti u kojima su pomiješane emocije sreće, zadovoljstva i činjenice da se svako odricanje i naporno treniranje na kraju isplati. Tada, ali i na cijelom njenom putu, najveća podrška su njena porodica i trener s kojim je svih ovih godina predano i uporno radila na ostvarivanju ovako uspješne sportske karijere.

Kada na terenu dobijete neki meč, ta pobjeda nije samo za medalju, ona je mnogo više od toga, emocije u tom trenutku su neopisive, aplauz i podrška publike dodatni su osjećaj sigurnosti i uspjeha na terenu, stoga moram biti svjesna u svakom momentu da sam to ja, Ada, i da moram pobijediti.

Naša stipendistica Ada Avdagić je članica taekwondo kluba „Sarajevo“ od samog njegovog osnivanja, tj. od 2012. godine. Nakon samo jedne godine treniranja u ovom klubu počela je učestvovati prvenstveno na lokalnim takmičenjima gdje je osvojila svoje prve medalje koje su bile svojevrsna najava regionalnih turnira.

Prve korake u tom dijelu života pamtim kao djevojčica koja je bila uporna, puna elana i upijala sam svaki korak svog trenera bez kojeg moj rad i trening ne bi bio ostvaren. Bila sam cijenjena u grupi koja je bila jedna od najboljih tog vremena, osvajali smo mnoge turnire i mečeve te nam je pobjeda bila jedina poznanica. Sve je krenulo od lokalnih turnira, a kada su osvojene i prve medalje, počela sam da idem i na regionalne turnire i shvatila da je taekwondo moj san za kojim žudim i koji se ostvaruje.

Neizostavno mjesto u njenom životu ima i Fondacija Hastor za koju s ponosom kaže da je njena druga porodica.

Fondacija Hastor ima posebno mjesto u mom životu, u njoj se osjećam kao dio velike i uspješne porodice. Mnogo prijatelja iz Fondacije me je podržalo, a većinu njih poznajem i danas, ta činjenica govori koliko je zapravo Fondacija Hastor bitna i važna za našu zemlju. Uz to imam i finansijsku podršku i prva moja stipendija jeste stipendija Fondacije Hastor kojoj sam neizmjereno zahvalna na svemu što čini za mene. Sam čin stupanja u Fondaciju Hastor napravio je preokret u mom životu te su na taj način moji uspjesi krenuli uzlaznom putanjom.

Veliki je ljubitelj volontiranja i ističe da je kroz volontiranje spoznala važnost komunikacije i interakcije u društvu što je jako važno za vrijeme u kojem se nalazimo.

Nastojim pronaći vrijeme i mogućnosti da bar djelomično budem dio volonterske zajednice i dam svoj doprinos istoj. Sve promjene koje se dešavaju polaze od pojedinca, ja na taj način želim biti pokretač pozitivnih promjena u jednoj lokalnoj zajednici, naravno sve to s mojim mentorima i grupom ostalih volontera. Na taj način moji uspjesi krenuli uzlaznom putanjom.

O čemu to najviše sanja naša Ada? Ističe da je san svakog sportaša nastup i medalja s Olimpijskih igara koje će biti održane u Parizu 2024. godine.

Svaki uspjeh je važan i veliki je doprinos za jednog pojedinca, ali uvijek može bolje, mora biti bolje. Moj san jeste medalja s Olimpijskih igara za koju ću se truditi i, nadam se, osvojiti. Svaki san je moguć, a ostvarit ćemo ga samo ako smo dovoljno uvjereni da ga možemo iznijeti na svojim leđima uz nadu i redovan rad na istom.

Uskoro očekuje potpisivanje ugovora za olimpijske stipendije od MOK i OK BiH što će biti podrška na putu ka Ol Pariz 2024.

Od 2020. godine imam status olimpijske nade BiH zahvaljujući ranijim rezultatima, a uskoro očekujem i potpisivanje ugovora za olimpijsku stipendiju od MOK i OK BiH što će biti podrška na mom putu ka Ol Pariz 2024. Državna prvakinja sam 2016, 2017, 2018, 2019. i 2020. godine. Zbog povrede nisam nastupala na državnom prvenstvu 2021, na moju žalost ili radost, tako je trebalo biti, ali me to nije zaustavilo u cilju za koji se borim.

Na samom kraju pitali smo Adu šta to ima poručiti mlađim naraštajima i stipendistima Fondacije Hastor.

Vjerujte u svoje snove i nikad ne odustajte. Svaki trud i rad kad-tad će dati željene rezultate. Ja sam svoj san započela s vjerom i nadom da ću jednog dana biti zlatno dijete Bosne i Hercegovine, moje domovine, da ću osvjetliti obraz mojih roditelja, trenera, porodice i prijatelja kao i moje Fondacije Hastor.

Poseban je osjećaj znati da druge činiš sretnim i ponosnim djelima koje činiš!



USPJESI STIPENDISTA

Treće mjesto iz karatea za našu stipendisticu Inelu Kavaz

Inela Kavaz je učenica prvog razreda Srednje zubotehničke škole u Sarajevu. Aktivno trenira karate već deset godina i osvajačica je mnogobrojnih kantonalnih, federalnih, državnih, ali i balkanskih takmičenja. Na posljednjem federalnom takmičenju osvojila je zavidno treće mjesto. Ljubav prema ovom sportu pobudili su, kako ističe, njeni treneri, a svakim novim treningom ta ljubav je rasla i jačala.

Karate treniram već deset godina i želju za ovaj sport pobudio je moj trener koji me doveo do svih ovih rezultata. Osim njega velika podrška mi je i trenerica.

Da je danas teško uklopiti sve obaveze, potvrđuje nam i Inela, međutim, uvijek se mora pronaći vrijeme za stvari koje nas ispunjavaju i čine sretnim. Ispričala nam je kako izgleda jedan njen dan.

Školu i treninge usklađujem najbolje što mogu. Ujutru sam u školi, a popodne učim. Nakon odrađenog treninga vraćam se kući, odmorim se i jedem, završim obaveze za školu i onda opet idem na trening. Poslije treninga ponovim školsko gradivo, završim dodatne obaveze i idem na spavanje.

Inela je stipendistica Fondacije Hastor već šest godina i s ponosom može reći da je uz istu odrasla. Stipendiju prima od trećeg razreda osnovne škole i ističe da joj je podrška koju joj pruža Fondacija od velikog značaja. Uz volonterske sate i svoje mentore gradi svoju ličnost, mišljenje, ali i uči kako isto izraziti. Od velike joj je pomoći mentorski tim, sa svojim mentorima saznaje mnogo novih informacija iz života, ali i struke za koju se trenutno obrazuje.

Fondacija Hastor je fondacija koja ispunjava sve segmente jedne ozbiljne i odgovorne organizacije. Moje mentorice unose harmoniju u moj život čak i preko kamere, a vjerujem da će uživo biti još i zanimljivije i opuštenije. Mnogo toga radimo, pričamo o raznim poučnim temama. Dobra, zajednička stvar je što moje kolegice idu u Srednju zubotehničku školu, a mentorica studira Stomatologiju, pa na taj način pomažemo jedne drugima u savladavanju prepreka i poteškoća.

Volonterski sati upravo za cilj imaju da zbliže pojedince, nauče ih da rade dobre stvari za svoje društvo i okolinu, pokažu nam kako najbolje djelujemo kad radimo ujedinjeno, ali i pomažu nam da se oslobodimo straha od javnog govora, da poštujemo tuđa mišljenja ali i iznesemo svoja.

Mentorice se trude da se zblizimo, da komuniciramo i da se riješimo straha i stida od javnog govora.

Podrška Fondacije u svim sferama života je posebna. Kako Inela ističe osim finansijske, veoma joj je bitna podrška na volonterskim satima.

Fondacija Hastor je velika podrška u mom životu. Poseban je osjećaj vratiti se sa sastanka sa novim, naučenim informacijama, iskustvima i dešavanjima.

Za kraj Inela je imala poruku za sve stipendiste koja je i nju samu vodila kroz sve izazove i takmičenja.

Stipendistima bih poručila da nikad ne odustaju od onoga što žele, da maštaju kao mala djeca i da slijede svoje snove jer samo istrajnost može dovesti do velikog rezultata, naravno, uz trud i zalaganje. Sve možemo i za sve smo spremni samo je bitno poslije svakog pada i udarca ustati i nastaviti još jače. Karate je jedan predivan sport koji bih preporučila svim generacijama.



USPJESI STIPENDISTA

Ismihana Klisura – učesnica federalnog takmičenja iz matematike

U proteklom periodu održan je veliki broj takmičenja koja su veliko osvježanje nakon pauze kojoj smo svjedočili kroz prethodne dvije godine, a jedno od takvih jeste takmičenje iz oblasti matematike za srednjoškolce koje se održavalo na općinskom, kantonalnom i federalnom nivou. Stipendistica Fondacije Hastor Ismihana Klisura ostvarila je zapažene rezultate na svim nivoima takmičenja.

Ismihana Klisura rođena je 30. juna 2003. godine u Travniku kao najmlađe dijete četveročlane porodice. Završila je Osnovnu školu „Mehurići“ kao učenica generacije. U osnovnoj školi prvi put se susreće s matematikom i fizikom, a znanje i ljubav prema ovim naukama doveli su je i do federalnih takmičenja. U istoj životnoj dobi upoznala se i s Fondacijom Hastor, čija je stipendistica već sedam godina.

Nakon početka školovanja u Elči Ibrahim-pašinoj medresi u Travniku, Ismihana se priključuje takmičarskom timu matematike. Pored članstva u ovom takmičarskom timu pružile su joj se i mnoge druge prilike za pokazivanje i unapređivanje talenata i vještina. Napredovala je na polju stranih jezika pohađajući kurs arapskog jezika, a poznavanje maternjeg jezika i sposobnosti kreativnog izražavanja pokazivala je kroz uredništvo školskog lista „Nedžm“. Iako je djelovala i na drugim poljima, nikada nije zapostavila prirodne nauke čemu svjedoči činjenica da je uspješno završila masterclassove iz fizike. Naša stipendistica učestvovala je i u razmjeni učenika između Elči Ibrahim-pašine i Behram-begove medrese, gdje su polaznici stekli nove vještine i znanja. U prvom razredu osvaja peto mjesto na kantonalnom takmičenju iz matematike i plasira se na federalno takmičenje. Nažalost, pandemija COVID-19 spriječila je održavanje svih takmičenja u drugom i trećem razredu.

Ono zbog čega danas ponajviše pišemo o Ismihani jeste plasman na federalno takmičenje iz matematike. Put koji ju je doveo do tog uspjeha opisuje ovako:

U okviru Dana općine Travnik organizovano je općinsko takmičenje iz matematike na kojem sam osvojila drugo mjesto. Kantonalno takmičenje se nije održavalo na nivou našeg kantona te smo pristupili kvalifikacionom takmičenju za plasman na federalno takmičenje i ostvarili odlične rezultate. Federalno takmičenje iz matematike održano je u Sarajevu na Prirodno-matematičkom fakultetu gdje smo također pokazali visok nivo znanja.

Pored navedenog takmičenja, tokom ove školske godine održan je i međunarodni matematički izazov „Klokani matematičari“, a Ismihana je zauzela prvo mjesto na nivou svoje škole. Također, pokazala je i svoj talent za društvene nauke uzimanjem učešća u Civitas programu.

Fondacija Hastor me u stopu pratila svih sedam godina i davala ogromnu podršku u svim mojim bitkama, obilježavala svaki moj uspjeh i naučila me da nikada ne umanjujem svoja postignuća. To nije fondacija koja samo finansira učenike, ona ih bodri, motiviše, osigurava, inspiriše, utiče na svaku sferu života, iz korijena ih podiže, zalijeva strpljenjem, hrani savjetima mentora, bogati znanjem, uči dobročinstvu, humanosti, radu i trudu i uvijek pruža osjećaj pripadnosti. Mi smo velika porodica ljudi, velikih umova poduzetničkog duha koja nastoji očuvati i unaprijediti svoj i živote drugih. Naše ideje su naša budućnost, a Fondacija Hastor nam omogućava da ih promoviramo.

Prepoznatljiva komponenta Fondacije Hastor je volonterski rad. Volonterski sati veoma su značajni za svakog pojedinca jer tada u prosjeku barem svakom petom ili sedmom djetetu u ovoj državi neko posveti pažnju.

Važno je da mlade ljude neko ima saslušati jer sigurno imaju mnogo toga za reći. Mjesečni volonterski sastanci s mentorima odlična su prilika Ismihaninim kolegama i njoj da dobiju priliku za razgovor o mnogim temama. Naučena značaju volontiranja iz višegodišnjeg iskustva s Fondacijom Hastor, Ismihana je odlučila da i ona posveti svoje vrijeme djeci koja žele razgovarati. Uključila se u Mrežu mladih Travnik gdje redovno nastoji doprinijeti zajednici i mladima kroz razne aktivnosti, programe, edukacije i druženja. Fondacija Hastor je izvor dobra koje se prostire na više strana. Put je težak, ali u ovoj porodici nikad ne nedostaje energije.

Svoje srednjoškolsko obrazovanje završavam 5.0 prosjekom i primjernim vladanjem kroz sve četiri godine. Hvala ti, Fondacija Hastor, što si mi dala do znanja da diploma ne treba nositi mene nego da ja diplomu nosim u sebi, u svojoj glavi čuvajući svoje znanje.



Uspjesi mladog fudbalera Tarika Berbića

Poznato je da bavljenje sportom čuva i unapređuje zdravlje, utiče na fizički i mentalni razvoj te razvoj vještina djeteta. Stipendisti Fondacije Hastor svakim danom dokazuju svoju sportsku nadarenost, a spektar njihovih aktivnosti sve je širi, što pokazuju i njihovi dobri rezultati te napredovanja na raznim poljima. Tarik Berbić je stipendista iz Janje koji je pokazao veliko interesovanje za fudbal, a u Fudbalskom klubu „Podrinje“ trenira već skoro osam godina.

Tarik Berbić je osmi razred OŠ „Meša Selimović“ u Janji, a stipendista Fondacije Hastor je pet godina. Učestvovao je više puta na fudbalskim takmičenjima na kojima je njegov klub nekoliko puta osvojio 1. mjesto.

Na posljednjem takmičenju koje je održano u Tuzli, Tarik je svojim golom donio pobjedu timu, a utakmica je završila rezultatom 4:3. Iako kaže da je bilo napeto i neizvjesno, svojim maksimalnim trudom u posljednjem trenutku je uspio dati pobjednički gol zbog čega je ponos cijelom timu.

Za mene je fudbal nešto veliko, od malih nogu ga igram, a svojim zalaganjem želim postići što bolje rezultate. Imam želju da se moj naporan trud isplati, da u budućnosti odem u neki klub koji će cijeniti moju spretnost na terenu i koji će primijetiti moje ambicije. Također, želim da se zahvalim svojim roditeljima za sve prethodne godine u kojima su me bodrili na putu ka uspješnoj fudbalskoj karijeri, kaže nam ovaj stipendista koji će nesumnjivo postići zavidne rezultate u budućnosti.

Pored porodice koja je Tarikova velika podrška, Fondacija Hastor ima značajnu ulogu u njegovom životu. Zahvaljujući Fondaciji shvatio je važnost pomaganja drugima, pogotovo onima kojima je pomoć najpotrebnija:

Fondacija me naučila mnogim korisnim stvarima. Ja sam oduvijek pomagao drugima kroz volontiranje kao što je i Fondacija Hastor meni pomogla kada mi je bila potrebna pomoć.

Tarik za sastanke sa mentorskom grupom kaže da su jako zabavni i da svaki put nauči nešto novo i korisno. Kao stipendista Fondacije Hastor, svim ostalim stipendistima poručuje da se svakodnevno bave nekom fizičkom aktivnošću:

Veoma je važno da se mladi svakodnevno bave sportom, prvenstveno zbog svog zdravlja. Sport nam može pomoći i da održavamo normalnu tjelesnu težinu, da se bolje osjećamo i izgledamo, a štiti nas i od raznih bolesti. Svim stipendistima želim mnogo uspjeha u ostvarivanju njihovih ciljeva, bilo to u sportu ili nekoj drugoj oblasti.



Uspjeh studentice Emire Mlivo - Od studenta do naučnika


Porodici Fondacije Hastor pripadaju stipendisti različitih zanimanja koji nesebično dijele znanje sa svojim kolegama. Obično se ističu po tome što uvijek žele učiniti korak naprijed i tako doprinijeti boljem sutra. Svaki stipendista sa svog stajališta i shodno svom zanimanju bavi se pitanjem budućnosti zajednice i našeg društva. Upravo u ovoj ambicioznosti vidimo snagu i mogućnost napretka. Jedan takav primjer je i Emira Mlivo.

Emira dolazi iz Bugojna i studentica je četvrte godine Farmaceutsko-zdravstvenog fakulteta Univerziteta u Travniku na Odsjeku za farmaciju, a u okviru studija aktivno se bavi i naučno-istraživačkim radom. Ove godine je u mjesecu aprilu učestvovala na Kongresu studenata biomedicinskih nauka Srbije s internacionalnim učešćem koji je održan na Kopaoniku. Tu priliku je iskoristila da prezentuje svoj naučno-istraživački rad iz oblasti toksikologije i bromatologije pod nazivom „Određivanje penicilina ELISA testom u hrani životinjskog porijekla“. Emira ističe da je u okviru sesije toksikologije i bromatologije upoznala i kolege s drugih univerziteta na internacionalnom nivou. Sažetak njenog rada može se pročitati u Knjizi sažetaka 58. Kongresa studenata biomedicinskih nauka Srbije sa internacionalnim učešćem, a rad će uskoro biti objavljen i u referentnim časopisima.

Ovakvi nastupi mladih ljudi pokazuju koliko je naše društvo bogato

“

S ponosom mogu kazati da sam stipendistica Fondacije Hastor osam godina i to mi predstavlja posebnu čast. Mnogo novih iskustava i poznanstava je dodatni poklon koji je, uz neizostavnu finansijsku podršku, Fondacija svima nama pružila. Riječima se ne može opisati osjećaj pripadnosti jednoj tako velikoj porodici! Mogu samo reći hvala za sve što svakodnevno činite za mene i sve druge stipendiste.



USPJESI STIPENDISTA

Od slučajnog treninga do brojnih medalja: treće mjesto na takmičenju u karateu za Alminu Mumić

Borilačke vještine objedinjuju tehnike samoodbrane, režim fitnesa i usvajanje discipline, a pozitivni učinci borilačkih sportova potvrđeni su brojnim naučnim istraživanjima. Karate, kao jedan od borilačkih sportova koji su nastali u Japanu, pripada tvrdim stilovima koji poboljšavaju tjelesnu kondiciju, ali i brzinu i snagu koja se iz nje dobija. Danas je karate jedan od popularnijih sportova među mladima, a u samoj Fondaciji Hastor znatan broj stipendista trenira ovaj sport. Jedna od stipendistica koja trenira karate već pet godina je Almina Mumić.

Alminaohađa 7. razred OŠ „Rainci Gornji“ u Raincima kod Kalesije i odlična je učenica. Ova trinaestogodišnjakinja je stipendistica Fondacije Hastor dvije godine, a pored karatea nedavno je počela trenirati i odbojku u kojoj također mnogo napreduje. U slobodno vrijeme voli crtati i osmišljati modne kreacije jer kaže da uvijek želi izgledati lijepo i drugačije od svih.

Ljubav prema ovoj borilačkoj vještini došla je, kako kaže, sasvim slučajno kada je s prijateljem otišla na jedan trening. Tada se u njoj probudio takmičarski duh koji je i danas uspješno motiviše i vodi na takmičenjima.

Prvi susret s karateom me oduševio, odmah sam osjetila želju za takmičenjima. Počela sam trenirati i ubrzo sam se počela takmičiti na kantonalnim, a kasnije i na većim takmičenjima. U karate ulažem dosta truda i rada kako bih bila što bolja i kako bih u budućnosti vidjela rezultate onoga čemu sam sada posvećena, kaže Almina.

Na nedavno održanom takmičenju u Gračanici Almina je zauzela treće mjesto, a učestvovalo je oko 340 takmičara iz mnogih klubova širom Bosne i Hercegovine. Naša stipendistica je nastupala u borbama u kategoriji za djevojčice do 39 kg. Osvojeno treće mjesto nije jedina nagrada koju ova uspješna karatistkinja posjeduje jer je kroz svih pet godina, koliko trenira, bila iznimno uspješna u ovom sportu. Zidove njene sobe krasi i uljepšavaju mnogobrojne medalje, pohvalnice i diplome kojih će u budućnosti sigurno biti još mnogo.


Nastupala je i u katama i ekipno gdje je pokazala da se uz dobar timski rad može postići zavidan rezultat. Kata predstavlja takmičenje u karateu koje se može odvijati individualno, ali i timski.

Radi se o simulaciji borbe sa zamišljenim protivnikom gdje se u serijama izvode razne tehnike ovog borilačkog sporta. Almina trenutno ima položernih sedam pojaseva od kojih je jedan preskočila jer je izuzetno napredovala i izdvojila se iz grupe za pojas više.

Smatram da je sport jako važan za naše zdravlje s obzirom na današnju ishranu koja je kod većine djece, a i odraslih jako nezdrava. Pored toga što uživam dok treniram, karate je sport koji me podstiče na zdravu ishranu, pa je i na taj način u mnogome djelovao na moj život. Poznata poslovice kaže da u zdravom tijelu leži zdrav duh, a ja bih djeci i mladima savjetovala da se bave bilo kojim sportom u kom se pronadu i koji ih ispunjava jer sport hrani i mozak i tijelo, kaže Almina.

Ističe da joj je Fondacija Hastor velika podrška u treniranju, ali i školovanju, jer sve što joj je potrebno za trening kupi zahvaljujući stipendiji koju prima. U budućnosti planira da, kada dobije crni pojas, polaže za trenera i sudiju kako bi učila drugu djecu koja žele trenirati karate kao što su nekada i nju naučili njeni treneri. Fondacija je u mnogome motiviše i na tom polju jer u njoj nalazi brojne primjere uspješnih mladih ljudi koji slijede svoje snove i ostvaruju svoje ciljeve. Sastanci s mentorskom grupom mnogo znače Almini jer na tim sastancima o svemu razgovara sa svojim mentorima, a uvijek nešto novo i zanimljivo nauči.

Moja poruka drugim stipendistima je da budu zahvalni Fondaciji na podršci i pomoći te da budu odgovorni kada je riječ o njihovim obavezama. Važno je da uče i da ostvaruju svoje snove, a posebno je važno da budu aktivni, kreativni i jako pozitivni. Ja sam imala sreću da me Fondacija Hastor stalno podsjeća na to koliko je važno da svakodnevno učimo i tragamo za novim znanjima i zbog toga je ona bez sumnje utkana u sve moje uspjehe, ističe uspješna karatistkinja Almina Mumić.



Filantropska misija Seade Jusufije: Takmičenje u Civitasu

U vremenu u kojem živimo gotovo je neophodan dio društva koji će svoje djelovanje usmjeriti na put pomaganja drugima i bezuvjetnog suosjećanja s njima. Fondacija Hastor može se pohvaliti time da već godinama unazad odgaja i podržava mlade ljude koji svakodnevno uče o važnosti filantropije uz svijest da kroz takvo djelovanje imaju mogućnost mijenjati svoje društvo i postati uzor svojoj zajednici i mlađim naraštajima. Sjajan primjer suosjećanja s drugima i pomaganja svome okruženju, što je ujedno i osnovna ideja djelovanja Fondacije Hastor, dugogodišnja je stipendistica Seada Jusufija koja je svoje filantropske aktivnosti ostvarivala u okviru Civitasa. U nastavku slijedi divna i inspirativna priča o Seadi i njevoj filantropskoj misiji.

Devetnaestogodišnja Seada Jusufija rođena je i nastanjena u Travniku. Pohađala je Treću osnovnu školu Oborci i osnovnoškolsko obrazovanje uspješno je okončala sjajnim rezultatima te je svoj put nastavila u Srednjoj stručnoj školi Bugojno. Naša Seada je stipendistica Fondacije Hastor već punih šest godina. Ideju filantropije koju Fondacija Hastor izrazito njeguje izvrsno pokazuje njen primjer jer se Civitasu pridružila iz razloga što ona, kao građanin, može učestvovati i doprinijeti napretku društva.

Učestvovala je na takmičenju iz Civitasa, a budući da pohađa smjer tehničar drumskog saobraćaja, u skladu s tim je i izabrana tema s kojom je njena grupa učestvovala na takmičenju. Seada i njene kolege predstavili su temu „Uzroci stradanja mladih u saobraćaju“ i tako su ukazali na veoma aktuelan problem u našem društvu. Seadin tim se najprije takmičio na školskom takmičenju gdje su osvojili prvo mjesto, a nakon toga su dobili priliku za plasman na kantonalno takmičenje gdje su također zauzeli prvo mjesto.

Svojevrсна nagrada za trud i veliki uspjeh Seadi i njenom timu bilo je prisustvo na finalnoj 25. smotri Svjetskog samita građanskog obrazovanja u Sarajevu, a posjetili su i Parlamentarnu skupštinu Bosne i Hercegovine.

Za ulogu Fondacije Hastor u njenom rastu i razvoju Seada kaže sljedeće:

Kroz Fondaciju Hastor, a naročito kroz volonterske sastanke stekla sam nova poznanstva i prijateljstva zbog čega sam Fondaciji mnogo zahvalna. Koncept volontiranja i to što imamo mentore koji nam pomažu da se usavršavamo odlična je ideja jer sam kroz sastanke uvidjela da smo uvijek tu jedni za druge.

Sama želja za učešćem na ovom takmičenju je rezultat svega što me je naučila i na šta me je podsticala Fondacija. Njena važnost u mom životu je nemjerljiva iz razloga što me je usmjerila na to da svakodnevno radim na ostvarenju svojih želja i ovom prilikom joj zahvaljujem na dosadašnjoj, a nadam se i budućoj podršci.

Fondacija Hastor Seadi želi sreću u nastavku školovanja i vjerujemo da će, kako je to radila i do sada, nastaviti da predstavlja Fondaciju Hastor u najljepšem mogućem svjetlu.



USPJESI STIPENDISTA

Ajdin Čeliković: Uspjeh na Red Bull Paper Wings takmičenju

Svaki kolektiv bez sumnje čine ljudi različitih profesija i afiniteta, a jedan od primjera takvog kolektiva je i Fondacija Hastor koju čine hrabri, mladi ljudi koji svakodnevno postavljaju nove granice uspjeha. Biti dio kolektiva ne znači samo nizati vlastite uspjehe nego svojim uspjesima i podstaknuti druge na rad, marljivost i organizaciju. Stipendisti na razne načine svjedoče ovoj paradigmi, a student Medicinskog fakulteta Ajdin Čeliković nam je pokazao da se uvijek možeći korak više.

Ajdin dolazi iz Kladnja, ima 20 godina i student je prve godine Medicinskog fakulteta Univerziteta u Tuzli. Za Red Bull Paper Wings čuo je od svog prijatelja koji je i sam predstavljao Bosnu i Hercegovinu na istom takmičenju 2019. godine. Slušajući pozitivne utiske o Red Bull Paper Wings takmičenju i sam je poželio da stekne jedno takvo iskustvo. Takmičenje se zasniva na bacanju papirnih aviona, a onaj čiji avion najduže leti pobjeđuje. Kroz druženja s prijateljem naučio je i kako napraviti prvi avion, nakon čega je došla faza kvalifikacija u svim većim gradovima Bosne i Hercegovine, pa tako i u Tuzli, a Ajdin se plasira na državni nivo takmičenju u Sarajevu. Taj čin zahtijevao je intenzivno vježbanje nekoliko dana, što je Ajdinu prčinjavalo veliko zadovoljstvo. Na prvenstvu je osvojio prvo mjesto u kategoriji najduža distanca, a njegov avion je letio 37.8 metara. To je otvorilo put za predstavljanje Bosne i Hercegovine na svjetskom prvenstvu u Salzburgu što je bilo iskustvo koje je Ajdinu posebno značilo. U Salzburgu je ostao 5 dana, a cjelokupna organizacija, svečana ceremonija otvaranja na Red Bull areni te obilasci grada učinili su boravak nezaboravnim. Takmičenje se održalo u dvije faze. Prvi dan priliku za superfinale imalo je 15 zemalja od njih 68, a zatim je uslijedila borba za trofej najboljeg pilota papirnih aviona. Uprkos velikoj tremi koju je osjećao, Ajdin se uspio plasirati u superfinale i zauzeti 11. mjesto. Ovog puta njegov avion je letio 47.49 metara. U cijeloj ovoj priči o neobičnom takmičenju posebnu ulogu ima Fondacija Hastor.


“

Fondacija Hastor za mene predstavlja jedan važan oslonac u životu. Član sam Fondacije još od petog razreda osnovne škole pa je u suštini Fondacija bila tu kroz cijelo moje školovanje i pomagala mi je u raznim segmentima u životu, ne samo u novčanom smislu nego i na mnogim drugim, možda i važnijim poljima. Posebno pamtim tu 2013. godinu kada smo s Fondacijom išli u Holandiju na malo duži boravak što je za mene bilo nezaboravno iskustvo. Volontiranje kroz koje sam s vremenom postajao zrelija ličnost dovelo me sada do mjesta mentora pa imam priliku svoje iskustvo i znanje prenijeti na mlađe stipendiste te doprinijeti njihovom razvoju i unapređenju.

Ajdin posebno ističe mentorstvo u okviru volontiranja jer za njega je to značilo prekretnicu u nastavku školovanja s obzirom na to da su mu mentori pomogli da ne odustane od studiranja. Na ovaj način on je spoznao vlastite mogućnosti što je jedan od ciljeva mentorstva. Nadamo se da će ova priča pomoći i drugima da spoznaju svoje potencijale i nastave pomjerati granice uspjeha.



PREDSTAVLJANJE UČENIKA GENERACIJE



PREDSTAVLJANJE UČENIKA GENERACIJE

Omar Zubović

Omar Zubović iz Stoca je svoje osnovnoškolsko obrazovanje stekao u Prvoj osnovnoj školi Stolac odličnim uspjehom i prosjekom 5,0 tokom čitavog školovanja, a obrazovanje nastavlja u Srednjoj elektrotehničkoj školi u Mostaru, na smjeru Elektrotehničar računarske tehnike i automatike za programiranje i razvoj softvera. Njegov cilj je završiti srednju školu i fakultet, steći novog znanja, upoznati razne kulture i običaje, biti pismen, obrazovan, ali i zaigrati u nekom od poznatih fudbalskih klubova i za Reprzentaciju Bosne i Hercegovine, jer je fudbal nešto što voli i što ga čini sretnim.


Kaže kako je tajna njegovog dosadašnjeg uspjeha je konstantna podrška i motivacija ljudi koji vjeruju u njega, a među njih svrstava i Fondaciju Hastor te svoje mentore.



Aida Suljić

Stipendistica Aida Suljić iz Kalesije proglašena je ovogodišnjom učenicom generacije Mješovite srednje škole Kalesija, gdje je pohađala nastavu na smjeru za zvanje ekonomski tehničar.

Kroz srednjoškolsko obrazovanje razvila je mnoge vještine, otkrila određene talente i više se posvetila svojim hobijima. Najviše uspjeha imala je na polju pisanja te je osvojila tri prva, dva druga mjesta na različitim literarnim konkursima te plaketu "Musa Ćazim Ćatić". Tokom čitavog trajanja srednje škole je bila redovan član brojnih sekoija, kao i član, a kasnije zapisničar i predsjednik Vijeća učenika. U skladu sa završenom srednjom školom te uspjesima u toku školovanja, upisuje Ekonomski fakultet Univerziteta u Tuzli.



Uvijek me savjetuju i motivišu da mogu biti bolji i raduju se mojim uspjesima. Volontiranja i mentori me inspirišu da uspijem u životu i ostvarim svoje ciljeve te da i ja budem taj koji će pomagati ljudima oko sebe i radovati se njihovim postignućima kao da su moja. Svima nam je potrebna podrška i neko ko će vjerovati da možemo još više i još bolje kada ni mi sami ne vjerujemo u to. Upravo to je Fondacija Hastor nama stipendistima- podrška i neko ko vjeruje u nas.

Uvijek me savjetuju i motivišu da mogu biti bolji i raduju se mojim uspjesima. Volontiranja i mentori me inspirišu da uspijem u životu i ostvarim svoje ciljeve te da i ja budem taj koji će pomagati ljudima oko sebe i radovati se njihovim postignućima kao da su moja. Svima nam je potrebna podrška i neko ko će vjerovati da možemo još više i još bolje kada ni mi sami ne vjerujemo u to. Upravo to je Fondacija Hastor nama stipendistima- podrška i neko ko vjeruje u nas.

PREDSTAVLJANJE UČENIKA GENERACIJE

Lejla Efendić

Naša stipendistica Lejla Efendić živi u Gradačcu, gdje je svoje osnovnoškolsko obrazovanje okončala stekavši titulu učenice generacije u Osnovnoj školi „Dr. Safvet-beg Bašagić“, gdje je kroz cjelokupno školovanje ostvarivala prosjek 5,0. Uporedo sa osnovnom školom završila je i Osnovnu muzičku školu Gradačac na klavirskom odsjeku. Učestvovala je na velikom broju takmičenja iz predmeta Matematika, Fizika, Hemija, Vjeronauka i Historija, gdje je ostvarivala zapažene rezultate i plasmane. Pored školskih takmičenja ističe odlične plasmane na mektebskim takmičenjima. U slobodno vrijeme voli čitati knjige, gledati televizijske serije te učiti strane jezike. Školovanje planira nastaviti u Behram-begovoj medresi u Tuzli.

Stipendiju Fondacije Hastor koristim za obrazovanje i vanškolske aktivnosti. Uvjerena sam da mnoge mlade osobe upravo zbog Fondacije Hastor imaju mogućnost nastaviti školovanje.



Asmira Kunić

Asmira Kunić je stipendistica koja dolazi iz Gornje Kamenice u Zvorniku. Ovogodišnja je učenica generacije Osnovne škole „Jovan Cvijić“ Drinjača.

Fondacija Hastor mi je puno pomogla finansijski tokom školovanja. Kroz volonterske radionice, koje su bile pune poučnog sadržaja, stekla sam puno prijatelja. Kroz Fondaciju sam naučila da smo puno jači kao tim nego pojedinac. Zahvalna sam također zato što se učešćem u volonterskim aktivnostima Fondacije trudim biti još bolja u svom obrazovanju. Hvala vam za sve ove godine!



PREDSTAVLJANJE UČENIKA GENERACIJE

Halil Jugo

Halil Jugo iz mjesta Oborci kod Donjeg Vakufa je još jedan od ponosa Fondacije Hastor. Tokom cjelokupnog pohađanja Treće osnovne škole je imao prosjek 5,0 te stekao titulu ovogodišnjeg učenika generacije škole.

Velika mi je bila čast primiti priznanje za učenika generacije, jer je na kraju moj trud bio nagrađen. Drago mi je što sam bio taj koji je predstavio svoju školu i svoju generaciju.

Pored nastavnih aktivnosti, predstavio je školu na Danu poezije u Donjem Vakufu te bio gost na tamošnjem radiju, a u slobodno vrijeme voli se baviti programiranjem. Svoje školovanje će nastaviti u IT gimnaziji u Travniku. Fondaciji Hastor je zahvalan na podršci koju mu pruža, kako materijalnoj tako i moralnoj.



Dženita Muratspahić

Nastavljamo nizati imena naših stipendista koji su jedno bitno poglavlje svog obrazovanja završili kao devetnaestogodišnja Dženita Muratspahić, maturantica Mješovite srednje škole u Bugojnu na smjeru medicinska sestra/tehničar te učenica generacije. Ovo će Dženiti biti drugo takvo priznanje, obzirom da je i osnovnu školu završila kao učenica generacije.

Stipendija mi je dala ogromnu potporu i motivaciju za dalji trud. Fondacija Hastor mi je pružila priliku da upoznam sjajne ljude koji se bore za obrazovanje te nas uče humanosti i svemu onom što je dobro za našu zajednicu i društvo. Zbog svega navedenog, izražavam ogromnu zahvalnost Fondaciji, jer svega ovog ne bi bilo da nisam postala član ove divne zajednice.



PREDSTAVLJANJE UČENIKA GENERACIJE

31

Senad Pašanović

Senad Pašanović iz Travnika je odličnim uspjehom tokom sve četiri godine školovanja na smjeru Mašinski tehničar – konstruktor na računaru postao učenik generacije Mješovite srednje tehničke škole Travnik.

Veoma teško je održati odličan uspjeh sve četiri godine. Potrebno je puno, truda, rada i zalaganja, kako psihički, tako i moralno, a moralo se upotrijebiti i fizičkog rada, stoga je kombinacija svega toga davala velike rezultate.

Vannastavne aktivnosti koje najviše ističe da su obilježile naročito posljednje dvije godine su upravo volonterski sastanci naše Fondacije.

Fondacija mi je pomogla da postanem bolji čovjek i da gledam na budućnost s pozitivne strane, jer uz ovako dobre ljude, koji svojim zalaganjem i stipendiranjem pomažu učenike i studente tokom školovanja, ujedno se otvara sve veće tržište školovanih ljudi, što je u današnjem vremenu veoma potrebno. Na kraju, još jedno veliko hvala za Fondaciju Hastor.



Nejla Karalić

Nejla Karalić je stipendistica koja dolazi iz Novog Travnika. Ovo-godišnja je učenica generacije Mješovite srednje škole Travnik. Za sebe kaže da je po prirodi introvertna osoba i voljela bi da je društvenija. U slobodno vrijeme voli da čita, ali i voli prirodu te joj je hobi planinarenje. Kaže kako je Fondacija Hastor jako stabilna organizacija i velika podrška mladima koji žele da napreduju.

Znatno mi je pomogla u teškim trenucima te sam joj neizmerno zahvalna.

Svoje školovanje nastavlja na Elektrotehničkom fakultetu u Sarajevu, na smjeru Računarstvo i informatika.



PREDSTAVLJANJE UČENIKA GENERACIJE

Marela Janković

Marela Janković iz Novog Travnika je ovogodišnja učenica generacije Srednje škole Novi Travnik, gdje je završila saobraćajni smjer te stekla zvanje Tehničar cestovnog prometa „A“. Opći uspjeh kroz čitavo srednjoškolsko obrazovanje bio je odličan. Školovanje nastavlja na vojnoj akademiji u Zagrebu. Fondaciju Hastor vidi kao jednu lijepu zajednicu, veliku porodicu, koja stipendistima kroz mjesečne sastanke daje mogućnost da se razvijaju kao ličnosti, budu komunikativniji, otvoreniji te tako izgrade svoje stavove i mišljenje.

Fondacija Hastor mi je puno pomogla, jer me motivirala da budem učenica generacije. Pomoću nje sam uvidjela da se itekako može dati svoj maksimum, da trebamo biti uporni, ustrajni i slijediti svoje snove, iako je to ponekad teško za nas. Ovim putem bih se željela zahvaliti Fondaciji što je bila tu sa mnom godinama i reći da sam ponosna što sam bila član ove divne porodice. Zahvalila bih se i svim mojim mentorima, pogotovo ovu zadnju godinu jer su jako dobro organizirali i vodili sastanke.



Nejra Muminović

Nejra nam dolazi iz mjesta Duratbegović Dolac, općina Gornji Vakuf-Uskoplje, gdje je odličnim uspjehom i titulom učenice generacije i završila Mješovitu srednju školu Gornji Vakuf, smjer Elektrotehničar računarstva i informatike. Svoje školovanje će nastaviti na Fakultetu informacijskih tehnologija Univerziteta „Džemal Bijedić“ u Mostaru.

Jednu od vodećih uloga u toku moga školovanja zauzela je Fondacija Hastor koja mi je pomogla da budem uspješna te sam stekla jaku motivaciju da nastavim svoje školovanje i postanem još uspješnija.



PREDSTAVLJANJE UČENIKA GENERACIJE

Larisa Burko

Naša stipendistica Larisa Burko je završila Mješovitu srednju školu u Bugojnu, smjer medicinska sestra/tehničar, te uspjehom 5,0 tokom sve četiri godine školovanja stekla priznanje Učenik generacije. Kada je riječ o vannastavnim aktivnostima, član je Asocijacije srednjoškola u BiH, kao i mnogih drugih organizacija, bavi se rukometom, a u slobodno vrijeme voli igrati odbojku, pjevati, svirati. Školovanje nastavlja na Stomatološkom fakultetu sa klinikama Univerziteta u Sarajevu.

Za nju Fondacija Hastor predstavlja odličnu priliku da stipendisti pokažu neke sposobnosti u koje možda ranije nisu bili sigurni ili nisu mogli, da upoznaju nove ljude iz zajednice te sklope nova prijateljstva, kao i da nauče nešto korisno od mentora i drugih volontera.

Fondacija Hastor mi je puno pomogla u toku ovih nekoliko godina, ne samo meni, nego i mojoj čitavoj porodici, kako bi moj brat završio fakultet, ali evo sada i sama ja.



Tajana Salkić

Stipendistica Tajana Salkić dolazi iz Zenice, gdje je završila osnovnoškolsko, a ove godine i srednjoškolsko obrazovanje. Odličnim uspjehom i prosjekom 5,0 tokom četverogodišnjeg školovanja u Općoj gimnaziji Katolički školski centar „Sveti Pavao“ je odabrana za ovogodišnju učenicu generacije te škole. Upisala je Politehnički fakultet u Zenici, iako u početku svog srednjoškolskog školovanja nije bila u potpunosti sigurna čime želi da se bavi. To je postalo kristalno jasno krajem trećeg razreda. Stipendistica Fondacije Hastor je četiri godine.

Fondacija mi je pružila mnoge stvari, ali najviše potporu i siguran prostor za upoznavanje veoma zanimljivih i ambicioznih mladih ljudi. Kroz uložene sate volontiranja stekla sam mnoštvo novih prijatelja, kao i vrijeme za rad na sebi. Fondacija me potakla da budem što bolja, ne samo kao učenik, nego i kao osoba, da težim za stvarima koje se čine nedostižnim i da uvijek budem ono što jesam. Za to ću joj uvijek beskrajno biti zahvalna.



PREDSTAVLJANJE UČENIKA GENERACIJE


Edina Kičin

Još jedan dokaz o tome kako su naši stipendisti po svemu posebni je i to da su čak tri stipendistice Fondacije Hastor učenice generacije Mješovite srednje škole u Bugojnu. Uspješno je upisala Fakultet zdravstvenih studija Sveučilišta u Mostaru, studij radiološke tehnologije. Kaže kako joj je Fondacija Hastor prvenstveno mnogo pomogla finansijski, obzirom da je medicinsko školovanje prilično skupo, ali i time što je motivira da se još više trudi i što je spaja s divnim mladim ljudima.



Semin Gudić

Semin Gudić iz Gornjeg Vakufa-Uskoplja je ovogodišnji učenik generacije Mješovite srednje škole Gornji Vakuf, u kojoj je uspješno završio školovanje na smjeru Elektrotehničar računarstva i informatike pri Elektrotehničkoj školi. Tokom školovanja je išao na mnoga takmičenja iz matematike i programiranja. Aktivan je član i volonter u Crvenom križu. Također, bio je aktivan član Omladinskog centra u Gornjem Vakufu-Uskoplju. Školovanje nastavlja na Fakultetu informacijskih tehnologija Univerziteta „Džemal Bijedić“ u Mostaru. Kaže kako je Fondacija Hastor velika inspiracija za stipendiste informacijskih tehnologija Univerziteta „Džemal Bijedić“ u Mostaru.



Po mom mišljenju, kao da je u pitanju osoba sa dobrom dušom i velikim srcem. Sakupila je dosta mladih i pomaže im u školovanju i ostvarenju snova. Tako vidim Fondaciju Hastor. Meni je u mnogo čemu pomogla. Mogao sam kupiti sav materijal za školovanje koji mi je trebao i bila mi je veliki podsticaj za moj uspjeh, jer uvijek mogu bolje zbog sebe, ali i zbog Fondacije.

PREDSTAVLJANJE UČENIKA GENERACIJE

35

Sara Sarajlić

Sara je stipendistica Fondacije koja dolazi iz Konjica. Ove godine je završila Karadžoz-begovu medresu u Mostaru, gdje je ponijela titulu učenice generacije. Školovanje nastavlja na Mašinskom fakultetu Univerziteta u Sarajevu na Odsjeku za industrijsko inženjstvo i menadžment. Za Fondaciju Hastor kaže kako joj je bila motivacija za učenje i bolji trud.

Fondacija mi je pomogla da završim srednju školu. Održanje stipendije mi je bilo ključno iz razloga nezaposlenosti mojih roditelja. Kroz volonterske aktivnosti sam naučila i spoznala istinske vrijednosti te je pomoglo meni kao mladoj osobi da povećam svoj angažman u zajednici i postanem omladinski radnik.



Harun Delić

Harun Delić iz Gradačca je ovogodišnji učenik generacije Osnovne škole „Hasan Kikić“ u Gradačcu. Tokom školovanja je učestvovao na mnogobrojnim takmičenjima, a najbolje rezultate je ostvarivao na takmičenjima iz informatike.

Informatika je moj hobi, volim programiranje i tehnologiju.

Fondaciju Hastor smatra podrškom prilikom usavršavanja sebe i svoje ličnosti.

Pružila mi je kako materijalnu, tako i moralnu podršku i dala do znanja da za svaki uspjeh u životu na neki način budeš nagrađen. Zahvalan sam na dosadašnjoj podršci i moja želja je da, nakon što završim svoje obrazovanje, nastavim njihovim stopama i podržim obrazovanje nekoga drugog.



Nelson Mandela je jedne prilike izjavio da je obrazovanje najmoćnije oružje koje možemo iskoristiti kako bismo promijenili svijet. Stipendistice i stipendisti Fondacije Hastor su primjer da u našoj domovini postoji mnogo mladih ljudi koji će svoje znanje i vještine iskoristiti kako bi svijet učinili boljim mjestom za život. Čak 26 stipendista Fondacije Hastor je po završetku protekle akademske godine okrunjeno različitim priznanjima.

Emira Mlivo

Samo jedna u nizu uspješnih stipendistica Fondacije Hastor je naša Emira Mlivo koja dolazi iz Bugojna. Emira studira integrisani studij farmacije na Farmaceutsko-zdravstvenom fakultetu u Travniku, a trenutno je četvrta godina studija. U prethodnoj akademskoj godini Emira je ostvarila prosjek 10,0 na osnovu čega je dobila priznanje „Nagrada dekana – student generacije“.






Kad je riječ o Fondaciji Hastor, dovoljno je samo istaći činjenicu da sam stipendista već osam godina. Riječima se ne može opisati osjećaj zadovoljstva zbog pripadnosti jednoj tako ogromnoj zajednici ljudi. Za mene je pripadnost Fondaciji Hastor posebna čast i zadovoljstvo jer mi, prije svega, pruža veliki broj novih iskustava pogotovo u segmentu volonterskog rada, a ujedno omogućava i finansijsku pomoć. Smatram velikom prednošću činjenicu da sam stipendista Fondacije Hastor za koju s pravom mogu potvrditi da predstavlja moju drugu porodicu. Na kraju još želim istaći da su svi stipendisti posebni i uspješni mladi ljudi, studenti i učenici te da je upravo upoznavanje takvih osoba nezamjenjiv i poseban segment pripadnosti Fondaciji Hastor!



Aleksa Piljak

Aleksa Piljak je izvanredni student Pravnog fakulteta Univerziteta u Sarajevu. Nakon okončanog prvog ciklusa studija njegov prosjek ocjena iznosio je 9,86 zbog čega je odlikovan posebnim priznanjem „Zlatna značka“ Univerziteta u Sarajevu.

Od druge godine studija, kada sam postao stipendista Fondacije Hastor, pa sve do okončanja prvog ciklusa studija Fondacija Hastor bila je organizacija koja mi je nesebično pružala svaki vid podrške u ostvarenju mog cilja. Samom dodjelom stipendije po okončanju prve godine studija Fondacija je bila prva institucija i organizacija koja je priznala i vrednovala moj fakultetski uspjeh. Takav odnos se nastavio i kroz naredne tri godine, odnosno do sticanja diplome Pravnog fakulteta i, konačno, priznanja „Zlatna značka“ UNSA.



Ajdina Kadušić

Ajdina Kadušić je stipendistica Fondacije Hastor koja je izuzetno uspješno završila prvi ciklus studija na Šumarskom fakultetu Univerziteta u Sarajevu. Zahvaljujući trudu i radu, ostvarila je prosjek ocjena 8,3 i, samim tim, kao najbolja studentica Šumarskog fakulteta, dobila „Povelju“ Univerziteta u Sarajevu.

Put do uspjeha je težak, pun prepreka i odricanja, ali sve je lakše kada si okružen ljudima koji su prije svega tvoji prijatelji, a onda i finansijska podrška. Fondacija Hastor je organizacija koja dugi niz godina raste i napreduje zajedno s mladim ljudima kojima pruža podstrek u ostvarenju ciljeva na različitim poljima. Biti dio kolektiva Fondacije Hastor za mene predstavlja veliku čast. Kroz pet godina, koliko sam član naše porodice, imala sam priliku upoznati divne ljude, obogatiti svoj period studiranja pozitivnim doživljajima i ponijeti mnogo korisnog znanja s naših druženja. Zahvaljujući volontiranju s učenicima, mjesečnim sastancima studenata i volontiranju u lokalnoj zajednici omogućeno mi je unapređivanje međuljudskih odnosa te spoznavanje i razvijanje vlastitih vještina i sposobnosti. Za svu pomoć, podršku i ljubav koju nam pruža Fondacija Hastor nastojimo se „odužiti“ volontiranjem i širenjem istih vrijednosti u svojim volonterskim grupama i lokalnim zajednicama kako bismo zajedničkim snagama pomogli i doprinijeli razvoju našeg društva, što nam zasigurno već dugi niz godina i uspijeva.



Adna Salković

Adna Salković je studentica treće godine na SSST-u (Sarajevo School of Science and Technology), Odsjek za računarne nauke. Ostvareni prosjek ocjena u prethodnoj akademskoj godini naše Adne je bio 9,92 te je zbog istog uvrštena na Dekanovu listu i dobitnica nagrade za ostvaren izvanredan uspjeh u istoj godini.

Za mene je Fondacija još jedan dodatni motivator i izvor ideja. Ljudi koji je čine i njihova djela ne ostavljaju vam drugih puteva osim da i sami budete takvi. Konstantna podrška i mreža ljudi Fondacije Hastor svakodnevni su izvor energije za one koji znaju to koristiti. Također, uvijek su tu da podrže uspjehe svih stipendista.



Hanna Helać

Hanna Helać je studentica četvrte godine integrisanog studija farmacije na Farmaceutskom fakultetu Univerziteta u Sarajevu. Hannin prosjek zaključno s trećom godinom iznosio je 9,27 pa je, zahvaljujući njemu, dobitnica „Pohvale Vijeća Farmaceutskog fakulteta“ za izuzetne rezultate u studiranju u akademskoj 2020/21. godini.

Postavši stipendisticom Fondacije Hastor, uvidjela sam značaj volonterskog angažmana i sve ljepote istog. U budućnosti, kada budem govorila o uspjesima za vrijeme studiranja, jedna od stavki će obavezno biti i postajanje dijelom porodice Fondacije Hastor. Za mlade ljude sa snovima i ambicijama od iznimne je važnosti okolina i da se okruže ljudima koji imaju slična razmišljanja. Smatram da je Fondacija Hastor motivirajuća i prijatna sredina za rast i razvoj mladih ljudi. Beskrajno me raduje što nam Fondacija pruža mogućnost da kroz volontiranje i druženje sazrijevamo i, pomažući zajednici, stičemo dragocjena iskustva.



Narcisa Hadžajlić

Narcisa Hadžajlić je prošle akademske godine završila prvi ciklus studija na Odsjeku za matematiku i informatiku na Filozofskom fakultetu Univerziteta u Zenici. Ukupnim prosjekom 9,83 tokom studija Narcisa je ostvarila priznanje Ministarstva obrazovanja i nauke za najbolje studente fakulteta Federacije Bosne i Hercegovine u 2021. godini.

Fondacija Hastor za mene je mnogo više od jedne fondacije koja me je stipendirala. Ona je porodica, utočište, izvor snage i motivacije, mjesto gdje se spajaju marljivost, zalaganje i empatija i stvaraju najljepše priče o ljudskosti. Značaj Fondacije za mene se ne može pretočiti u riječi. Od prvog dana kada sam kročila hodnikom Fondacije i prvi put razgovarala s našim dragim učiteljem Ramom, dok sam upoznavała ljudsko bogatstvo Fondacije i sklapala nova prijateljstva, pa sve do zadnjeg dana kada sam zvanično postala bivša stipendistica znala sam da će Fondacija zauvijek ostati moja druga porodica. Trebam spomenuti i neizmjernu vrijednost mjesečnih sastanaka, volontiranja s učenicima te vrijednost rada u sklopu tima za društvene mreže za moj lični i profesionalni razvoj. Fondacija je bila tu uz mene i ostat će kao heroj u knjizi moga života.

Ajla Sadiković

Ajla Sadiković, dugogodišnja stipendistica Fondacije Hastor koja dolazi iz Bugojna, završila je prvi ciklus studija na Pravnom fakultetu Univerziteta u Sarajevu prosječnom ocjenom 9,1 zbog čega je dobitnica „Srebrene značke“ Univerziteta u Sarajevu.

Članica sam Fondacije Hastor unazad 10 godina i zaista mi je čast biti dio ove velike i uspješne porodice te smatram da nijedan termin osim porodica nije dovoljan da iskaže koliki stepen povezanosti i podrške u njoj svakodnevno imamo. Osim finansijske pomoći i niza prijateljstava koje sam stekla kroz volonterske aktivnosti, posebno bih izdvojila motivaciju koju nam daju oni koji su na čelu ove porodice, a koja se odnosi na to da iz dana u dan radimo na sebi i nižemo uspjehe kako bismo upravo mi postali oni koji će donijeti pozitivne promjene u društvo. Svaki trud se isplati, a posebnu čar uspjehu daje činjenica da postoji neko ko ponosno stoji uz vaše uspjehe i vrlo rado ih promovira. Vrata Fondacije Hastor su otvorena za sve mlade i uspješne ljude, a jedno je sigurno, po uspjehu će zauvijek biti bez konkurencije.



Aldijana Zukić

Aldijana Zukić je studentica četvrte godine Pravnog fakulteta Univerziteta u Mostaru na kojem kontinuirano pokazuje svoju uspješnost. Naša Aldijana je svaku akademsku godinu do sada krunisala „Dekanovom nagradom“ koja se dodjeljuje najboljim studentima.

Član sam Fondacije Hastor pet godina, što za mene predstavlja izuzetnu čast i zadovoljstvo. Zahvaljujući Fondaciji upoznala sam perspektivne mlade ljude iz svih dijelova naše zemlje te sam svoje organizacijske i volonterske vještine uspjela podići na zavidan nivo. Mjesečni volonterski sastanci su posebno značajni za mene jer su mi omogućili da zajedno s djecom učim nove stvari i stičem iskustva te, samim tim, budem dio njihovog odrastanja. Velika mi je čast što sam dio ove velike porodice koja zajedno s nama prolazi kroz sve naše uspjehe i stvara pozitivnu priču u našoj državi te nam daje podršku u svim segmentima naših života.

Amra Pušina

Amra Pušina je studentica pete godine integrisanog studija na Medicinskom fakultetu Univerziteta u Sarajevu. Shodno visokom prosjeku ocjena koji iznosi 9,50, Amra je četvrti put dobitnica priznanja „Ponos dekana“ za najbolji uspjeh u svojoj generaciji.

Stipendista sam Fondacije Hastor godinu dana. Sretna sam što sam dio ove velike porodice koja ohrabruje mlade ljude i pruža im podršku za ostvarenje njihovih snova. Posebno zadovoljstvo mi čini uloga mentora i prenošenje znanja i iskustva mlađim generacijama koje nastojim motivisati na učenje i istrajan rad kako bi ostvarili svoje životne ciljeve, ali i, prije svega, bili dobri i pošteni ljudi na koje će se moći osloniti neke nove generacije koje nam dolaze.



Lejla Đapo

Lejla Đapo je trenutno studentica prvog ciklusa studija na SSST-u, Odsjek za kompjuterske nauke. Studira na trećoj godini, a na osnovu dosadašnjeg uspjeha, koji se ogleda u prosjeku 9,8, dobitnica je priznanja o izvanrednom uspjehu.

Biti dio porodice Fondacije Hastor za mene predstavlja veliku čast. Divno je biti dio okruženja koje prepoznaje uspjeh studenta i dodatno ga motiviše da daje sve od sebe. Fondacija Hastor ne samo da podstiče formalno obrazovanje, nego nas uči o ličnom razvoju i vrijednosti pomaganju drugima.

Ena Bešo

Ena Bešo je studentica druge godine diplomskog studija elektrotehnike na Fakultetu strojarstva, računarstva i elektrotehnike Sveučilišta u Mostaru. Dobitnica je „Dekanove nagrade“ za prethodnu akademsku godinu zbog ostvarenog izvanrednog prosjeka ocjena 5,0 (10,0).

Biti dobitnica „Dekanove nagrade“ je samo po sebi razlog za ponos, ali je lijepo i motivirajuće vidjeti da postoji neko ko cijeni moje rezultate i raduje se zajedno sa mnom mojim uspjesima. To je, osim mojih najbližih, i Fondacija Hastor kojoj sam iskreno zahvalna na velikoj podršci koju mi pruža na različite načine. Zaista je čast imati Fondaciju pokraj sebe dok koračam stazama znanja.



Aiša Abdelaziz

Aiša Abdelaziz trenutno je studentica prvog ciklusa studija na Metalurško-tehnološkom fakultetu u Zenici, Odsjek za hemijsko inženjerstvo. Na osnovu ostvarenog uspjeha i prosjeka ocjena koji iznosi 8,90 okitila se priznanjem – „Povelja dekana“ za drugu godinu studija.

Fondacija Hastor, stipendijom koju mi je omogućila, mnogo me motivisala da radim na sebi kako bih bila uspješnija na svim poljima. Kroz volontiranje imala sam priliku da učim i pokažem drugima koliko sam unaprijedila svoje znanje i koliko mi je Fondacija pomogla u tome. Ovom prilikom želim da se zahvalim Fondaciji koja mi je pružila nove životne prilike, nova poznanstva, interakciju i druženje kroz mjesečne sastanke i volonterske sate. Mladim ljudima poručujem da se svaki trud u konačnici isplati i nagradi.



Alek Isaković

Alek Isaković je uspješno okončao drugi ciklus studija Muzičke akademije Univerziteta u Sarajevu na Odsjeku za dirigovanje. Na kraju drugog ciklusa studija prosjek Alekovih ocjena iznosio je 10,0, stoga je dobitnik posebnog priznanja „Zlatna značka“ Univerziteta u Sarajevu za kombinirani uspjeh na prvom i drugom ciklusu studija.



Džana Vrabac

Džana Vrabac je uspješno diplomirala na prvom ciklusu studija na Fakultetu političkih nauka Univerziteta u Sarajevu, na Odsjeku za socijalni rad. Shodno prosjeku ocjena na prvom ciklusu studija, koji je iznosio 9,85, Džana je vlasnica najvišeg priznanja Univerziteta u Sarajevu – „Zlatne značke“.

Sigurno nešto najljepše što mi se dogodilo tokom studija jeste da sam na drugoj godini studija postala stipendistica Fondacije Hastor. Fondacija mi je omogućila da steknem znanja i vještine koje su mi bile korisne tokom studija i vannastavnih aktivnosti. Bila mi je bila velika motivacija u toku studiranja i omogućila mi je upis još jednog fakulteta. Neizmjereno sam zahvalna na podršci koju su mi pružali svih ovih godina.

“Iako Fondacija ima veliki broj stipendista, svi oni su bliski kao da je u pitanju jedan mali kolektiv ili, još bolje, porodica. Od direktora preko administracije do kolega iz drugih timova, svi su pristupačni i ne postoji princip nedodirljivosti, upravo suprotno, apsolutno svi su dostupni uvijek i zainteresovani za nove ideje, projekte, savjet, pomoć, čak i ako je potreban samo obični neformalni razgovor. To je ono što izdvaja našu Fondaciju Hastor od ostalih fondacija. Naravno, o finansijskoj pomoći ne moram ni govoriti, to je svakako itekako bitno, ali u prvom planu je zajedništvo, pristupačnost, ljudskost, motivacija i želja za uspjehom svih nas kao i svakodnevno neumorno praćenje napretka i općenitog stanja svakog stipendiste pojedinačno. Mogu sa sigurnošću potvrditi da to u drugim fondacijama ne postoji. Iz ovih razloga poželim da zauvijek budem student kako bih mogao biti i dio ove divne porodice. Naravno, i kada ne budem formalno više stipendista, svakako da ću se uvijek rado odazvati i vraćati aktivnostima i kolektivu Fondacije.”

Alma Ćosić

Alma Ćosić je trenutno studentica treće godine dodiplomskog studija na Mašinskom fakultetu na Univerzitetu „Džemal Bijedić“ u Mostaru. Dobitnica je „Dekanove nagrade“ za drugu godinu studija na osnovu ostvarenog prosjeka 8,60.

Za mene je Fondacija Hastor puno više od stipenditora. Fondacija Hastor je moja druga porodica koja pruža nesebičnu podršku i ljubav, kako meni tako i svakom drugom stipendisti. Kroz sve što radimo u sklopu Fondacije, mi zapravo učimo da budemo bolje verzije sebe. Kažu da u pravom okruženju možemo postići sve što zamislimo, za mene je Fondacija definicija tog pravog okruženja. Kada svaki mjesec imate priliku da čujete i pročitate priče uspješnih mladih ljudi, to vam daje dovoljnu motivaciju da se i vi nađete među tim ljudima i da sutra i vi inspirišete mlađe generacije.



Belma Kapić

Belma Kapić trenutno pohađa drugi ciklus studija na Tehničkom fakultetu Univerziteta u Bihaću na Odsjeku za tekstil. Na fakultetu je tokom dodiplomskog studija ostvarila ukupan prosjek od 9,86, a zahvaljujući prosjeku od 10,0 u akademskoj 2020/2021. godini dobila je nagrade Federalnog Ministarstva za nauku i obrazovanje za najboljeg studenta na Tehničkom fakultetu Univerziteta u Bihaću.

Fondacija Hastor dugi niz godina stipendiranjem podržava moje formalno obrazovanje. Ovakav vid finansijske i moralne podrške omogućio mi je završetak osnovne i srednje škole, dodiplomskog studija te trenutni status studenta na masteru. Godine stipendiranja izbrisale su osjećaj nezvjesnosti i izbistrile moje akademske, karijerne i životne ciljeve.



Ajla Prnjavorac

Ajla Prnjavorac je uspješno okončala prvi ciklus studija na Muzičkoj akademiji Univerziteta u Sarajevu na Odsjeku za duvačke instrumente (klarinet). Zahvaljujući ostvarenom prosjeku 9,3 dobitnica je posebnog priznanja „Srebrna značka“ Univerziteta u Sarajevu.



Azra Porović

Azra Porović je uspješno okončala prvi ciklus studija kao jedna od najboljih studentica Ekonomskog fakulteta Univerziteta u Sarajevu. Zahvaljujući ostvarenom prosjeku 9,15 dobitnica je „Srebrne značke“ Univerziteta u Sarajevu.



“Iako sam stipendistica tek drugu godinu, zasigurno mogu reći da je Fondacija Hastor imala veliku ulogu u mom životu, obrazovanju i svakom uspjehu koji sam postigla. Svi se nadamo barem jednom u trenutku kada pomislimo da ne znamo kako ćemo dalje i da nemamo izlaza iz određene situacije, ali u svakom tom trenutku Fondacija stoji iza nas da nam dokaže suprotno, da nas motiviše, nagradi i, najvažnije, nauči kako biti bolji čovjek koji će misliti na druge i istovremeno stvarati bolju budućnost. To je mjesto na kojem učimo da se ne trebamo takmičiti jedni protiv drugih, naprotiv, uspjeh postizemo kada stojimo jedni uz druge ujedinjeni protiv svega lošeg jer će za svakog uvijek postojati njegovo mjesto gdje će postići svoj puni potencijal i činiti dobro. Učimo da iz temelja mijenjamo mišljenje nabolje, pružamo ruku svakome kome je to potrebno i da uputimo lijepu riječ jer ona može nekome popraviti cijeli dan, a možda i život. Ukoliko shvatimo da nismo sami i da je svaki pojedinac u toj organizaciji bitan kao djelić jedne velike slagalice, gdje bez jednog djelića nema potpune slike, onda možemo postići izvanredne uspjehe i biti dio jedne velike promjene u BiH.”

“Ako ste odlučni da želite učiti, niko vas ne može zaustaviti. Može se desiti suprotno, da neko prepozna vaš trud i zalaganje te vas podrži u vašem personalnom razvoju. U mom slučaju to je bila Fondacija Hastor. Zнала sam da je Fondacija ta koja cijeni i prepoznaje trud koji mladi ulažu u obrazovanje, ali se nikad nisam odvažila prijaviti na konkurs – sve do prošle godine kada sam i postala dio ove velike porodice. Status stipendiste od početka percipiram kao priliku da znanje dijelim s mlađim učenicima i time se zahvaljujem Fondaciji na ukazanoj prilici. Posebnost Fondacije je upravo u tome što kroz volontiranje daje priliku svim stipendistima da postanu odgovorniji i bolji članovi svoje okoline. Volontiranje otvara nove puteve, imate nova poznanstva i prijatelje, stičete bolje organizacijske i prezentacijske vještine, a uz sve to znate da doprinosite zajednici. Mogu reći da je značka jedan vid potvrde onog što je Fondacija prepoznala u meni. Želja mi je da još mnogo mladih ljudi dobije priliku da postane dio ove porodice, a vjerujem da će biti odabrani oni pravi – trud i rad se uvijek isplate i zato ne odustajte!”

Una Karabeg

Una Karabeg studentica je treće godine dodiplomskog studija na Odsjeku za ekonomiju i međunarodni biznis na SSST-u. Kao jedna od najboljih studentica, ne samo na Odsjeku za ekonomiju već i Univerzitetu, dobitnica je nagrade „Godišnji certifikat o izvanrednim akademskim postignućima“ za prosjek ocjena 9,91 u akademskoj 2020/2021. godini.



Kroz studiranje mi je, kao i svakom drugom stipendisti Fondacije Hastor, finansijska pomoć značajno doprinijela, na čemu sam izuzetno zahvalna. Izazov je, ali i zadovoljstvo, konstantno imati priliku raditi na sebi kroz različite volonterske uloge i tako razvijati i lične, ali i kompetencije mladih ljudi s kojima radim. Ponosna sam što sam dio Fondacije koja promovise akademska postignuća jer na taj način damo pozitivan primjer nadolazećim generacijama čije će priče u godinama kasnije biti ispisane umjesto naših.

Lejla Ajanović

Lejla Ajanović je studentica druge godine drugog ciklusa studija na Mašinskom fakultetu u Sarajevu. Studira na Odsjeku za mašinski proizvodni inženjering, smjer Proizvodne tehnologije, automatizacija i robotika. Odlukom dekana Mašinskog fakulteta u Sarajevu dobitnica je pohvale za izvanredne rezultate u toku prve godine drugog ciklusa studija s prosječnom ocjenom 9,92.



Stipendista Fondacije Hastor sam od februara prošle godine. Za odličan uspjeh u prethodnoj akademskoj godini je zaslužna i sama Fondacija. Biti dio porodice kao što je Fondacija Hastor za mene predstavlja veliku čast te mi daje novu motivaciju za rad i usavršavanje. Naučila sam mnogo stvari, unaprijedila mnoge vještine i stekla nove prijatelje i poznanike kroz volonterski angažman, ali najbitnije što sam naučila jeste da se rad i trud uvijek isplate.

Azra Smajić

Azra Smajić dolazi iz Konjica, a trenutno studira na Fakultetu informacijskih tehnologija u Mostaru na prvom ciklusu studija. Prošle akademske godine bila je dobitnica priznanja za ostvareni uspjeh u vidu „Dekanove nagrade“ za prosjek 9,64.

Dio sam porodice Fondacije Hastor već od srednje škole. Osim što mi Fondacija predstavlja veliku finansijsku podršku tokom mog školovanja, daje mi i veliku inspiraciju. Članovi naše velike porodice, koje sam imala priliku upoznati upravo kroz sastanke, naučili su me da se uvijek borim za više i bolje te da budem najbolja verzija sebe. Nadam se da ću u budućnosti to i postati.



Ajla Tubok

Ajla Tubok je uspješno završila Fakultet sporta i tjelesnog odgoja na Univerzitetu u Sarajevu, a trenutno pohađa drugi ciklus studija na istom Fakultetu. Zahvaljujući prosjeku ocjena ostvarenom na prvom ciklusu studija koji je iznosio 9,02 Ajla je dobitnica „Srebrene značke“ Univerziteta u Sarajevu.

Stipendistica sam Fondacije Hastor dugi niz godina te ono što sa sigurnošću mogu reći, a ujedno i ono što je najbitnije, jeste to da je ona moja druga porodica, snaga, motivacija, želja, volja, rad i trud. Često razmišljam o tome koliko sam sretna što baš njih imam kao porodicu koja je brinula o meni sve ove godine i pružala mi toliku ljubav i podršku kroz moje školovanje. Uvijek ću im biti zahvalna na tome i nadam se da ću opravdati njihovo povjerenje.

Amela Džidić

Amela Džidić je uspješno završila prvi ciklus studija fizioterapije na Fakultetu zdravstvenih studija Univerziteta u Sarajevu. Tokom prvog ciklusa studija Amela je ostvarila prosjek ocjena 9,0 te je dobitnica priznanja „Srebrna značka“ Univerziteta u Sarajevu.

Fondacija je velikim dijelom zaslužna za moj uspjeh jer da nije Fondacije, ja ne bih mogla studirati, a tako ni ostvariti ovaj uspjeh i biti ono što danas jesam. Osim finansijskog dijela, pomogla mi je i da se izgradim kao ličnost te poboljšam socijalne vještine, radne navike i upoznam studente iz mnogih krajeva Bosne i Hercegovine i ostvarim nova prijateljstva. Draga Fondacijo Hastor, ne mogu ti se nikada dovoljno zahvaliti.



Amina Abaspahić

Amina Abaspahić je studentica drugog ciklusa studija Odsjeka za historiju Filozofskog fakulteta Univerziteta u Sarajevu. Kao najboljem studentu Odsjeka za historiju i zahvaljujući ostvarenom prosjeku 9,36 dodijeljeno joj je priznanje „Srebrna značka“ Univerziteta u Sarajevu.

Fondacija Hastor mi je pored velike finansijske pomoći omogućila nešto što je trajnije i vrednije – mogućnost volontiranja kroz različite aspekte, prostor za djelovanje, nesvakidašnje prilike za moje dalje usavršavanje te konstantnu motivaciju koja me podstiče na istrajnost u tome da budem najbolja u onom što volim raditi. Iako je moj ulazak u Fondaciju Hastor bio uvjetovan mojim dotadašnjim uspjehom, Fondacija mi je dala dodatni podstrek koji je ranije znao biti glavni faktor na mom putu ka uspjehu.



Emir Bakunić

Emir Bakunić studira na drugom ciklusu studija Mašinskog fakulteta Univerziteta u Sarajevu na Odsjeku za motore i vozila. Prošle akademske godine Emir je ostvario prosjek 9,17 na osnovu čega je dobitnik „Pohvale za izvanredan akademski uspjeh“ od dekana Mašinskog fakulteta.

Fondacija Hastor mi je u mnogome pomogla i bila inspiracija za moj trud koji je naposljetku rezultirao uspjehom. Fondacija je na mene djelovala kao „vjetar u leđa“ bez kojeg ne bih postigao uspjeh koji sada imam.



Ana Milijević

Ana Milijević je uspješno okončala drugi ciklus čime je stekla zvanje magistricice likovnih umjetnosti studija. Studij je okončala prosjekom 9,9 zahvaljujući kojem je i dobitnica dvostrukog priznanja „Zlatna značka“ Univerziteta u Sarajevu.

Fondacija Hastor je dragocjeno mjesto susreta mladih unutar kojeg sam imala priliku provesti tri godine. Taj period obojili su naši mjesečni sastanci na kojima smo ohrabivali jedni druge uspješnim pričama. Istinsko zadovoljstvo za mene je bilo biti dijelom nastanka velikih ideja mojih kolega među kojima sam stekla i neka, nadam se, doživotna prijateljstva. Osim naših sastanaka koji su na mene ostavljali intenzivan dojam, Fondacija je prvo mjesto na kojem sam naučila kako da djelujem u poslovnom svijetu i saradnji koja je svakog mjeseca radala mjesečni bilten kao odlučujuću stepenicu puta kojim će moja profesionalna karijera krenuti – grafički dizajn. Fondaciji mogu zahvaliti upravo na tome što mi je pomogla da napustim svoju zonu komfora i spoznam svoju istinsku viziju budućnosti.



VANNASTAVNE AKTIVNOSTI STIPENDISTA

Spoj talenata Lejle Muhić

Da je talenat samo mali dio našeg uspjeha, a sve ostalo rad to kažu mnogi, a dokazuje naša stipendistica Lejla Muhić! Lejla je učenica četvrtog razreda Gimnazije „Meša Selimović“ u Tuzli. U svoje slobodno vrijeme najviše voli da crta, šminka i uči strane jezike. Kroz razgovor sa ovom nadarenom stipendisticom saznali smo da je talenat za crtanje otkrila još u ranom periodu osnovne škole kroz različite sekcije u koje se rado uključivala. Svakako, od samog početka mogla je računati na neizostavnu podršku, a tu prednjači njena porodica.

Skriveni biser riznice naše Fondacije najviše voli crtati za svoju dušu, zatim vizuelno predstaviti zadatke koje dobija od mentorske ekipe na volonterskim sastancima, kao i za školske potrebe.

Na to sve, ona kaže:

“**Crtanje me opušta i smiruje zbog toga što imam priliku iskoristiti maštu i uploviti u svoj svijet, a najbolje se izražavam kroz kreativne zadatke na volonterskim sastancima.**”

Također, ovaj hobi želi zadržati na istom nivou, ne videći ga kao komercijalnu aktivnost. Kada malo bolje promislimo, hobi pretvoren u komercijalnu aktivnost vrlo često prestanemo gledati kao hobi i odmor za dušu, već još jednu obavezu u nizu koja ponekad pričinjava teret.

Lejla ističe koliko je bitno raditi na jačanju vlastitih potencijala:

“**Druge bih nagovorila da neumorno rade na otkrivanju i razvijanju svojih talenata i dio slobodnog vremena izdvoje za svoju dušu (svoje hobije). Posvećenost hobijima vodi ka uvođenju nove dnevne rutine te odličnom time managementu i visokoj odgovornosti.**”

Da Fondacija ima iznimno veliku ulogu u životu svakog stipendiste vidi se i iz sljedeće Lejline izjave:

“**Za mene Fondacija Hastor predstavlja zajednicu u kojoj možeš da budeš to što jesi, da izraziš sve svoje misli i stavove bez osude drugih te gdje možeš računati na konstantnu podršku i pomoć ostalih članova. Stipendistima Fondacije Hastor Lejla poručuje: „Najbitnije je raditi ono što volimo i u čemu uživamo, ne obraćajući pažnju na to šta će drugi reći.“**”



VANNASTAVNE AKTIVNOSTI STIPENDISTA

Crtanje kao jezik ljubavi

Merima Pajalić, studentica prve godine Fakulteta zdravstvenih studija u Bihaću, izvrstan je primjer da simbioza medicine i umjetnost itekako može funkcionirati.

Merima je stipendistica Fondacije Hastor još od 2016. godine i dolazi nam iz viteškog grada Bužima. Od samih početaka školovanja pokazivala je zavidne rezultate na takmičenjima iz matematike, fizike i hemije. Njena priča je zaista šarolika i interesantna jer, pored nauke, naša Merima ima težnje prema umjetnosti, tačnije slikanju na platnu akrilnim bojama.

U razgovoru s Merimom saznali smo da je njen talenat otkriven još u ranom djetinjstvu, crtala bi po cijele dane a na pitanja šta želi biti kad poraste, Merima kaže da je spremno odgovarala: "Umjetnica." Kasnije, u toku osnovne škole sudjelovala je na likovnim takmičenjima i konkursima gdje je vrlo često bila među najboljima. Ipak navodi da u početku nije bila dovoljno hrabra da počne sa slikanjem, kao i mnogi od nas koji su imali strah od velikih koraka. Zahvaljujući majci čija joj je podrška dala vjetar u leđa, Merima se osmjellila da napravi prvi korak.


"Mama me nagovorila i to na način da me zamolila da pokušam uraditi sliku za naš dnevni boravak pa da vidimo kako će to da uspije. Kada bih morala izdvojiti jedan momenat u vremenu, to bi bio definitivno momenat kada sam vidjela kako ta moja slika izgleda na zidu i stvarno sam bila ponosna na sebe. Upravo je ona "krivac" što danas većinu svog slobodnog vremena pored fakultetskih obaveza i druženja, posvećujem svom hobiju-slikanju."

Merima je otvorila stranicu na Instagram i Facebook društvenim platformama pod nazivom "Design by Merima" i otkriva nam da svakog dana napreduje, ima sve više kupaca i dobar dodatni džeparac. Kaže da slikanje na nju djeluje opuštajuće, da zaista uživa u svemu tome što radi, a još jedan od ljepših dijelova ove priče je da uljepšava ljudima njihove domove i njihove zamisli pretoči u djela. Kupci naručuju slike preko stranica, u željenim dimenzijam, a najčeći motivi su cvijeće i kaligrafija.

Stipendija Fondacije Hastor joj uveliko olakšava realiziranje ovog posla, jer pomoću nje kupuje materijale koji su joj potrebni za rad, a pored tog, studira i ono što voli. Merima kao i mnogi umjetnici kada pričaju o svojoj branši ističe da uz slikanje zaboravi na stvarnost i isključi se, a u skorijoj budućnosti Merima planira da počne sa izradom personaliziranih postera i nada se da će joj to poći za rukom.

Osim umjetnosti, Merima ističe da je "zaljubljena" u čin pomaganja drugima, naročito nakon spoznaje o veličini uloge medicinske sestre u procesu zdravstvene njege. Iz tog razloga odabrala je studij na Odsjeku za sestrinstvo te se u budućnosti želi baviti ovim humanim pozivom. Merima je uspjela spojiti ljubav i posao u svakom pogledu i to je zaista jedan od uspjeha, a onima koji se još traže i usuđuje na velike korake u ostvarivanju svojih ciljeva poručuje:

"Hrabro se upustite u avanture koje mogu proizaći iz vašeg hobija. Nikad ne znate iz kojeg ugla će podrška da dođe i na koji način će da vam krene. Ja sam godinama oklijevala i sumnjala da ja to ne mogu, a kada sam krenula bilo mi je žao što nisam prije. Sve ide step by step, jer uspjeh je trijumfupornosti."



VANNASTAVNE AKTIVNOSTI STIPENDISTA

Svijet muzike iz perspektive Adne Oraščanin

Neopisiva je čast svakog mjeseca pisati o mladim i talentiranim ljudima, njihovim ambicioznim planovima i izvanrednim dostignućima. Divno je biti svjedok i savremenik onoga što jesu i onoga što postaju. Retke ovog članka ispunit ćemo pričom o Adni Oraščanin, koja trenutno pohađa drugi razred srednje škole Centra za slijepu i slabovidnu djecu i omladinu u Sarajevu na smjeru fizioterapeutske tehnike.

U Centar za slijepu i slabovidnu idem od mog prvog razreda osnovne škole. Pored svakodnevnih obaveza s nastavom, imam i dosta slobodnih aktivnosti od kojih je glavna muzička nastava. Sviram harmoniku, gitaru, tarabuk i klavir s tim da gitaru najduže sviram (nekih 7 godina). Također, mnogo vremena provodim čitajući s obzirom na to da je čitanje moja velika ljubav. Uz to uživam i u učenju stranih jezika.

Pored svega navedenog Adna već više od 5 godina obavlja volonterske aktivnosti u okviru Fondacije, a prethodne godine napravila je i jedan značajan uspjeh na regionalnom nivou.


Bilo je to regionalno takmičenje koje se održalo prošle godine sa sistemom glasanja na evrovizijskom principu. Bilo je potrebno poslati od 3 do 5 tačaka od kojih su ostale zemlje birale najbolju nakon čega je izabrana tačka odlazila u finalno glasanje za najbolje tačke takmičenja.

Takmičile su se škole za obrazovanje djece i mladih sa oštećenjem vida iz Srbije, Hrvatske, Slovenije, Makedonije, Kosova i, naravno, škole iz BiH, ukupno 8 škola. Samo takmičenje je održano online, a prvo mjesto je osvojilo Kosovo sa samo bodom razlike u odnosu na moj tim. Ono što je vrlo važno da napomenem je to da sam ja član školskog orkestra i mi smo kao ekipa osvojili drugo mjesto.

Adna kaže da trenutno ima mnogo ciljeva i da u najvećoj mjeri, kroz mentalnu i materijalnu podršku, njihovu realizaciju potpomaže Fondacija Hastor.

Trenutno mi je glavni cilj da uspješno završim srednju školu te da upišem fakultet. Naravno, uz sve to, tu je i moj cilj da što više razbijam predrasude o osobama s oštećenjem vida, a vjerujte da se u ovakvom društvu u kakvom živimo takav zadatak teško može brzo riješiti. Prednost mi je to što naša škola uvijek radi na tome da se slijepu i slabovidne osobe odlično pripreme za samostalan život.

Dok naša Adna neustrašivo korača putem uspjeha, mi ćemo sa zadovoljstvom pisati o njoj, diviti se njenom radu i uživati u njenoj muzici. Želimo joj mnogo novih pobjeda i da nam još mnogo puta bude povod za pisanje nekog novog članka u rubrici najboljih.



VANNASTAVNE AKTIVNOSTI STIPENDISTA

Od hobija do biznisa – recept za uspjeh stipendistice Nejele Dedić

Mladi ljudi danas nerijetko svoje slobodno vrijeme provode u izlascima, druženjima i ponajviše na društvenim mrežama. Ipak, uz dobru organizaciju mi vjerujemo da je moguće i učiniti nešto za svoju dušu, nešto što nas ispunjava, ali na kraju krajeva i nešto od čega se može dodatno zaraditi. Svjesni smo da je studentima novac itekako potreban, te da nekolicina njih pokušava pronaći dodatne poslove da bi pokrili svoje troškove i ostvarili dodatni budžet. Da se od hobija i slobodnog vremena u studentskim danima može razviti biznis i zaraditi dodatni džeparac dokaz je naša svestrana stipendistica Neja Dedić. Neja je odrasla u Visokom, a trenutno studira na Fakultetu umjetnosti i društvenih nauka na IUS-u, smjer Vizualne umjetnosti.

Stipendistica Fondacije Hastor je već 5 godina. Kako kaže, Fondacija joj je pomogla u razvijanju njene ličnosti, ali i hobija.

Uz Fondaciju sam odrasla i pregurala period u životu kad sam se najviše razvijala kao ličnost i otkrivala svoje talente i zanimanja. Fondacija mi je uvijek bila vjetar u leđa da postignem što bolje rezultate i da budem najbolja verzija sebe, u čemu su mi posebno koristili volonterski sastanci.

Istina je da joj fakultetske obaveze uzimaju dosta vremena, ali i da ona svo slobodno vrijeme koristi na stvari koje ispunjavaju njenu dušu.

Trenutno nemam previše slobodnog vremena, ali kad god stignem koristim ga da slikam, fotografišem, šijem, heklam i naravno vodim svoj mali biznis. Rekla nam je kako je ustvari započeo njen biznis i da li može zaraditi od istog. Prvu ručno rađenu torbu sam napravila sebi. Svidjela se drugaricama pa su tražile da i njima napravim slične torbe te me na taj način ohrabrine da počnem ozbiljnije da se bavim izradom ručnih radova i da ih objavljujem na društvenim mrežama. Zadovoljna sam potražnjom za mojim radovima i, hvala Bogu, od kad sam počela da ih radim nikad nisam bila slobodna, uvijek imam neku narudžbu u toku. Lahko je pronaći vrijeme za nešto što me opušta dok radim, a istovremeno mi osigurava pristojan džeparac.

Svjesni smo činjenice da su društvene mreže danas broj jedan u razvijanju posla, ostvarenju komunikacije i poznanstva, ali i prodaje. Neja nam je također potvrdila kako joj društvene mreže pomažu u promociji i prodaji njenih radova. Njeni radovi doista pokazuju talentat, ljubav i predanost poslu, a torbe su daleko najpopularniji i najtraženiji njen proizvod.





VANNASTAVNE AKTIVNOSTI STIPENDISTA

Ljubav prema volontiranju stipendiste Bakira Đuhere


Svrha života je pomaganje drugima, međutim, kada se odlučimo pomagati drugima, ne trebamo očekivati nešto zauzvrat baš kao što ni drvo nikada ne pojede svoje plodove. Priroda nas uči da svoj um ne trebamo koristiti samo za sebe već i za druge, a najbolji pokazatelj da je bezuslovno pomaganje drugima moguće kao krajnji cilj je stipendista Fondacije Hastor Bakir Đuhera koji je svoje slobodno vrijeme odlučio provesti kako bi pomagao drugima, a samim tim i sebe učinio ispunjenim i zadovoljnim. Upravo je Fondacija Hastor našem stipendisti bila inspiracija za volontiranje koje svesrdno ispunjava te je svoj budući poziv usmjerio na put pomaganja drugima.

Šesnaestogodišnji Bakir Đuhera je stipendista Fondacije Hastor koji živi u Novom Šeheru. Trenutno pohađa Srednju mješovitu školu Žepče, smjer medicinska sestra-tehničar, a stipendista Fondacije Hastor je od 2018. godine. U slobodno vrijeme voli da uči jezike, a tečno govori njemački i engleski jezik. Pored toga, voli da putuje i na taj način proširuje svoje vidike i rezone. Bakir naglašava kako ga je volontiranje odmalena privlačilo jer je htio da pomaže ljudima te dodaje da ga volontiranje čini smirenim i sretnijim.

Zahvaljujući volonterskim sastancima koje organizira Fondacija Hastor i volontiranju u toku svakog mjeseca naš stipendista je spoznao koliko je volontiranje važno jer je smisao života biti produktivan i koristan drugima. Uz sve navedeno i sam Bakirov poziv na koji se odlučio veoma je human i podrazumijeva dosta odricanja, ali on, kako dodaje, na prvo mjesto gotovo uvijek stavlja pomoć svojoj okolini što ga je i nagnalo da se odluči za zanimanje medicinskog tehničara.

Svoja znanja o medicini naš Bakir je odlučio proširiti kroz vannastavne aktivnosti upisavši se na sekciju prve pomoći u svojoj srednjoj školi. Na spomenutoj sekciji redovno pohađa treninge na kojima učenici zapravo dobijaju praksu i vježbu te na svojevrsan način i volontiraju. Kako je pokazao vrlo zapažene rezultate na sekciji prve pomoći, izabran je za jednog od takmičara koji je učestvovao na općinskom takmičenju u Žepču koje je održano u aprilu 2022. godine. Trud, rad i zalaganje doveli su do toga da je Bakir, zajedno sa svojim timom, na općinskom takmičenju odnio pobjedu. Sekcija prve pomoći nastavila je nizati uspjehe te su se plasirali na kantonalno takmičenje koje je održano u maju 2022. godine i na kojem su također osvojili prvo mjesto. Naš stipendista ističe da su ovi plasmani rezultat istrajnog rada i truda cjelokupnog tima koji se odlučio pomagati i s takvom primarnom idejom postigli su nevjerovatan uspjeh. Na federalnom takmičenju održanom krajem maja 2022. godine Bakirova sekcija se plasirala na zavidno četvrto mjesto.

Kada je u pitanju mjesto i uloga Fondacije Hastor u njegovom obrazovanju, Bakir je istakao sljedeće:



Što se tiče Fondacije Hastor, ona je izuzetno važna za sve nas stipendiste zato što bez nje mnogi ne bismo bili tu gdje jesmo. Pored materijalne podrške koju Fondacija Hastor pruža, a koja je za mene itekako važna, Fondacija je velika zajednica uspješnih ljudi koja stoji iza mojih leđa, ali i iza leđa svakog stipendiste ponaosob. Zahvaljujući Fondaciji spoznao sam benefite i čar volontiranja te sam nastavio primjenjivati volontiranje u mom svakodnevnom djelovanju.



VANNASTAVNE AKTIVNOSTI STIPENDISTA

Volontiranje kao sastavni dio života stipendistice Amre Pušine

Amra Pušina je stipendistica Fondacije Hastor nešto više od dvije godine, ali je i kroz tako kratak vremenski period uspjela pokazati svoje vrline koje se najviše ogledaju u njenoj nesebičnosti i želji za pomaganjem drugima. Tokom osnovnoškolskog i srednjoškolskog obrazovanja imala je odličan uspjeh i učestvovala je u mnogim sekcijama i vannastavnim aktivnostima. Ljubav prema knjizi i nauci, želja za pomaganjem, spašavanjem ljudskih života, njegovanjem empatije i humanosti samo su neki od razloga zbog kojih se Amra opredijelila za studij medicine, a trenutno je studentica pete godine Medicinskog fakulteta Univerziteta u Sarajevu. Godine rada, truda i posvećenosti dale su rezultate, pa je četiri puta uzastopno bila dobitnica priznanja Ponos dekana za najboljeg studenta u svojoj generaciji. Amra ističe da joj osvojene nagrade i priznanja mnogo znače, ali da nisu presudan faktor za njen uspjeh jer je istinski zaljubljenik u medicinu, neko ko uživa u učenju, sticanju znanja i svaka spoznaja je ispunjava na poseban način.

Učenicima svoje volonterske grupe često ponavljam jedan citat koji me još kao osnovca zaintrigirao: "Svako je genije. No, ako sudite ribu prema njenoj mogućnosti da se popne na drvo, ona će cijeli život živjeti u uvjerenju da je nespособna." Čovjek je najproduktivniji, najkreativniji i najsretniji onda kada je posve 'uronjen' u ono čime se bavi. Veoma je važno da volimo ono što radimo i dajemo najbolje od sebe.

Volontiranje u lokalnoj zajednici Amra često obavlja u Udruženju „Budi mi drug“ koje djeluje u njenoj općini i okuplja osobe različitog uzrasta s poteškoćama u mentalnom i tjelesnom razvoju. „Budi mi drug“ je priča o hrabrosti, borbi i neizmornoj ljubavi jedne majke koja 2006. godine osniva Udruženje kako bi pomogla svom sinu s Down sindromom, ali i ostalim roditeljima i djeci koja se nalaze u sličnoj situaciji.

Svjesna činjenice da u društvu u kojem živimo postoje brojne predrasude i stereotipi te da su ljudi s poteškoćama u razvoju nerijetko etiketirani i marginalizirani, Amra je željela na neki način pomoći i doprinijeti podizanju svijesti o značaju posvećivanja pažnje osobama s invaliditetom i njihovog uključivanja u društveni život. Udruženje „Budi mi drug“ bila je izvrsna prilika, međutim, Amra navodi kako su njeni prijatelji iz Udruženja, zapravo, više pomogli njoj. Nakon nekoliko sati provedenih s njima, osjeća se odmorno i uvijek bude ispunjena pozitivnom energijom, svaki put je iznova podsjetila na to kako sve što je lijepo u životu stane u srce i naše malo djelo, ponekad samo osmijeh i topla riječ nekome znače cijeli svijet.

Biti stipendista Fondacije Hastor mi je velika čast i zadovoljstvo. Osim finansijske podrške, Fondacija Hastor stvara mrežu mladih, uspješnih, vrijednih, talentovanih i altruističnih ljudi koji su tu jedni za druge, promovišu znanje, rad, upornost, a samo tako možemo graditi budućnost i inicirati promjene u društvu u kojem živimo. Stekla sam nove prijatelje, sklopila brojna poznanstva i mislim da je to najdragocjenije u Fondaciji Hastor – činjenica da u skoro svakom gradu imate bar jednu osobu koju poznajete. Već godinu i po sam mentor mladim stipendistima koji su učenici. Uloga mentora je uzbudljiva, ali istovremeno i veoma odgovorna. Trudim se doprijeti do svakog učenika, pružiti im podršku, motivisati ih i inspirisati da budu što bolji ljudi. Mnogo me obraduje kada na kraju radionice i naših sastanaka uspješno urade zadatke a nerijetko me i iznenade svojim talentima i vještinama. To su, zaista, vrijedni mladi ljudi na koje sam neizmerno ponosna.

Amra je samo jedna u nizu stipendista Fondacije Hastor kojima je u njihovoj životnoj misiji prioritet pomaganje drugima. Nadamo se da će njen primjer poslužiti kao inspiracija drugim mladim ljudima da se pokrenu i svojim aktivizmom poboljšaju živote drugih ljudi jer se dobro dobrim vraća.

KRVI DARUJETE
DAN ROBENDAN
GODIŠNJICU
DAN NA PLAŽI
POD ZVIJEZDAMA
PRIJATELJIMA
SRLJAJ
MJEH
INSU



VANNASTAVNE AKTIVNOSTI STIPENDISTA

Majra Šišić – uspješna studentica fizike

Majra Šišić, jedna od najaktivnijih stipendistica Fondacije Hastor, porijeklom je iz Kaknja. Majra pohađa četvrtu godinu studija fizike, smjer Teorijska fizika na Prirodno-matematičkom fakultetu u Sarajevu. Stipendistica je Fondacije Hastor već dvije godine. Što se tiče aktivnosti i volontiranja, još od prve godine studija aktivno učestvuje u aktivnostima Društva fizičara u FBiH.

Konkretno, svake godine po nekoliko puta jedan je od glavnih organizatora kampova i škola fizike za učenike osnovnih i srednjih škola te je na istima i predavač. To budu škole za nadarene učenike, gdje uče fiziku mnogo više nego na redovnoj nastavi i gdje se pripremaju za takmičenja. Kroz organizaciju ovih kampova Majra je naučila dosta toga, kako napraviti materijale za promociju (flyere, postere, objave na Facebooku...), praviti rasporede, koordinirati većom skupinom ljudi i sl.

Također, pored organizacije i predavanja na kampovima fizike, ona drži pripremne nastave za učenike koji se kvalifikuju da predstavljaju BiH na nekim internacionalnim takmičenjima iz fizike. Dakle, na osnovu federalnih i državnih takmičenja njene kolege i ona dobiju tim „najboljih“ učenika (tj. najspremnijih za tu godinu) koji će predstavljati BiH na raznim svjetskim olimpijadama iz fizike. Prethodne dvije godine Majra je bila vođa ekipe za Balkansku olimpijadu iz fizike.

Na obje olimpijade ostvarili su odlične uspjehe! Naime, 2020. godine osvojili su zlatnu medalju za BiH, prvu ikada osvojenu iz nekog internacionalnog takmičenja iz fizike, a godinu nakon su također osvojili jednu zlatnu medalju. Ovaj uspjeh smatra posebno velikim jer je kao lider ekipe mjesec dana intenzivno radila s učenicima. Ovo je jedna od aktivnosti na koju je Majra najponosnija.

“*Zašto sam baš odlučila da radim za Društvo fizičara i na koji način me to ispunjava? Pa, dakle, za fiziku i matematiku sam oduvijek imala velike afinitete. Ja sam se također takmičila još od osnovne škole i znam da mi je uvijek bilo malo to što naučim samo u školi. Takvih učenika ima mnogo i, nažalost, naš obrazovni sistem je nekako prilagođen masi, tj. prosječnom učeniku, ne posvećuje se pažnja učenicima koji su posebno nadareni za bilo koju oblast. Kroz rad u Društvu fizičara pokušavam na to utjecati. Kroz naše kampove učenici zaista imaju priliku mnogo toga da nauče, da steknu prijatelje iz cijele BiH i šire i sl. i to je do sada pokazalo odlične rezultate, naši učenici svake godine sve više napreduju. Dosta njih se uspije upisati na prestižne fakultete u Bosni i Hercegovini i svijetu. Također, ja uistinu volim da predajem i svoje znanje širim dalje, pa je i to jedan od razloga zbog kojeg me ovaj rad ispunjava. Činjenica je i da sam zaista mnogo toga i naučila, ne samo u vezi s onim što se tiče isključivo moje oblasti nego i razne druge vještine (socijalne, informatičke, ekonomske).*”



VANNASTAVNE AKTIVNOSTI STIPENDISTA

Majra Šišić – uspješna studentica fizike

Pored Društva, ove godine počela je da se aktivno bavi radom na projektima na fakultetu. Naime, trenutno s asistentom radi naučni rad na temu „Odd and even harmonic generation from CO and NO molecules by bi-elliptical orthogonally polarised two-colour field“. Za sada ide odlično i svoj rad će prezentirati na Naučnoj konferenciji u Sarajevu, „PSYCONBA 2022.“, koja će trajati od 30.6. do 1.7.2022. godine. Također, daje zadatke i učestvuje kao član takmičarske komisije na federalnim i državnim takmičenjima iz fizike. Naučni rad na kojem radi izdvaja kao još jedan uspjeh na koji je izuzetno ponosna iako voli kazati da je ponosna na sve što je postigla u životu.

Majra izdvaja da je Fondacija Hastor značajno utjecala na to da uvidi koliko je važno volontirati i pomagati drugima. Kroz rad i volontiranje u Fondaciji shvatila je koliko u Bosni i Hercegovini imamo učenika svih uzrasta kojima je potrebna pomoć. Tu, naravno, ne misli samo na finansijsku, nekome je potrebna samo lijepa riječ, da mu posvetite pola sata svoga dana, da popričate s njim, saslušate ga, nekome su potrebne instrukcije iz nekog predmeta, a nekome pomoć oko nekog posla.

Načini na koje možemo pomoći drugima su zaista beskonačni samo ako znamo kako i kuda trebamo gledati. To je ono što me je Fondacija naučila.

Smatram da je veoma važno da mladi ljudi budu aktivni u društvu! Svako od nas ima svoj talent i svoju priču. Kada bismo pojedinačno posvetili makar mali djelić svoga vremena da taj talent iskoristimo na društveno koristan način, zamislite koliko bi se naše društvo u cijelosti unaprijedilo. Ljudi često kažu da nemaju vremena za volontiranje i društveno koristan rad, međutim, uz dobru organizaciju vremena ništa nije nemoguće. Ja sam ove godine završna godina fakulteta i pored toga imam razne aktivnosti koje sam iznad navela, a od ove godine sam i u administrativnom timu Fondacije Hastor pa i tu imam mnogo više obaveza negoli sam imala ranije. Međutim, opet uz dobru organizaciju imam vremena i za razne slobodne aktivnosti i hobije kao npr. planinarenje, trčanje i sl. kojima se zaista aktivno i rado bavim.

Ono što Majra poručuje drugim stipendistima Fondacije je da nastave marljivo raditi i truditi se jer se zaista svaki rad i trud isplati, ali sve ono što radom i trudom postignemo za sebe, postaje potpuno tek kada se podijeli s drugima! I tek tada pričinjava neko posebno zadovoljstvo. Nemojmo biti škrti u dijeljenju svoga talenta i znanja s drugim ljudima jer se dobro dobrim vraća.



PREDSTAVLJANJE TIMOVA S POSEBNIM ZADUŽENJIMA

PREDSTAVLJANJE TIMOVA SA POSEBNIM ZADUŽENJIMA

REDAKCIJA

Redakciju Fondacije Hastor čine stipendisti koji pomno planiraju sadržaj koji će se naći u okviru newslettera i web-stranice Fondacije Hastor, biraju teme za tekstove, pišu ih te uređuju. U okviru newslettera, koji se objavljuje mjesečno, mogu se naći članci koji govore o uspjehu stipendista, pozitivnim primjerima, svakodnevnim aktivnostima, ali se predstavljaju i umjetnički radovi u okviru poetskog kutka. Kako je i spomenuto, pored newslettera, naša redakcija uređuje i tekstove koji se objavljuju na web-stranici Fondacije te time pravovremeno obavještava stipendiste i širu javnost o najznačajnijim događajima vezanim za Fondaciju.

“Biti član redakcije Fondacije Hastor zaista predstavlja veliko zadovoljstvo. Redakciju smatram timom u punom smislu te riječi. To je tim ljudi koji nisu samo u timu radi toga što znaju pisati kvalitetne tekstove, osvrte i slično, već imamo izuzetno prijateljski odnos te iste ciljeve - da sve divne priče naših stipendista za koje saznamo na najljepši mogući način predstavimo svima onima koji prate i čitaju sadržaj web-stranice, newslettera ili godišnjeg izvještaja - bilo da su to bivši, sadašnji, budući stipendisti ili neko od prijatelja i donatora Fondacije Hastor. Biti član redakcije i saznati za sve te divne priče i uspjehe zaista budi ponos. To svako od nas dijeli u timu, ponosni smo što naši stipendisti iz dana u dan rade na najboljoj verziji sebe, nižu uspjehe te čine promjene u svojim lokalnim zajednicama. Pored ponosa, dosta toga kroz čitanje podataka o nečijoj aktivnosti i naučimo, često i nešto s čime nismo bili upoznati prije pa smo istraživali o toj temi kako bismo što kompetentnije prikazali nečiju priču.

Alek Isaković

PREDSTAVLJANJE TIMOVA SA POSEBNIM ZADUŽENJIMA

IT TIM

Redovno ažuriranje službene web-stranice Fondacije Hastor, izrada novih projekata te održavanje postojećih je povjereno IT timu, koji je zaslužan za online platformu Fondacije Hastor. Njom je olakšan rad stipendista kao i slanje izvještaja ili najava volonterskih druženja te su se na ovaj način izbjegle komplikacije koje su ranije mogle biti prisutne.

Za IT Tim Fondacije Hastor volontiram primarno u funkciji održavanja i ažuriranja web-stranice Fondacije. Kroz vrijeme provedeno u IT timu imao sam priliku koristiti i učiti o WordPress platformi i to u cilju ažuriranja neslettera Fondacije, objavljivanja različitih članaka kao i ažuriranje naslovnice. Kao članovi IT tima, kvalitetna suradnja sa osobljem iz administracije kao i ostalim timovima je jedan od glavnih ciljeva svih članova - da sav njihov vrijedni rad prikazemo upravo na najkvalitetniji način na stranici, kao i da uvažavamo njihove sugestije za popravke na putu ka ostvarivanju tog cilja kroz našu snalažljivost, komunikativnost i upornost.

Haris Berilo


PREDSTAVLJANJE TIMOVA SA POSEBNIM ZADUŽENJIMA

TIM ZA ODRŽAVANJE DRUŠTVENIH MREŽA

Mi u Fondaciji Hastor smo itekako svjesni važnosti informisanja u svijetu današnjice, stoga naš tim za održavanje društvenih mreža svakodnevno kreira objave na društvenim mrežama (Facebook, Instagram, LinkedIn). Svaka objava se zasebno posmatra i projektuje, dizajn objave se prilagođava temi, sadržaj je sažet, ali veoma informativan. Svojim objavama tim informiše javnost o dešavanjima u okviru Fondacije, rezultatima stipendista te najavljuje nadolazeće događaje.

Tim za održavanje društvenih mreža Fondacije Hastor bih opisala kao idealan spoj odgovornosti, predanosti i zadovoljstva, a biti dio ovog tima je zasigurno jedna od najboljih obaveza kojoj se možete posvetiti. Glavni razlog su dinamичnost i kreativnost koji su neizostavni te svakodnevno usvajanje novog znanja, bogaćenje vokabulara, istraživanje i proširivanje vlastitih vidika. Znanje stečeno prilikom volontiranja u timu za uređivanje društvenih mreža je primjenjivo u svakom segmentu današnjeg života, kako privatno tako i poslovno. Mogu reći da se volontiranje u timu sastoji iz dva podjednako važna segmenta: tekstualni dio i grafički dizajn, pa samim tim to zahtijeva i vizualnu i verbalnu komunikaciju sa većim brojem ljudi koji prate društvene mreže Fondacije Hastor a koje želimo informisati, podsjetiti ili educirati o određenoj temi. Veoma sam sretna i zahvalna na prilici da budem dio tima i rado pozivam naše stipendiste da nam se pridruže jer sam sigurna da će im to biti najzanimljiviji volonterski rad do sada.

Anisa Karić



PREDSTAVLJANJE TIMOVA SA POSEBNIM ZADUŽENJIMA

TIM ZA GRAFIČKI DIZAJN

Mjesečni newsletter, godišnji izvještaji, web-stranica i društvene mreže Fondacije Hastor uvijek imaju kreativan i profesionalno osmišljen dizajn. Za to su zaslužni studenti likovnih akademija odsjeka za grafički dizajn, multimediju i sl. Pored svojih glavnih obaveza, u okviru svog rada vode računa o dizajnu svih dokumenata i priznanica koje nastaju i koriste se u Fondaciji.

Volontiranje u timu za grafički dizajn je poseban i zanimljiv izazov. Kroz različite zadatke možete izraziti svoju kreativnost i tako uljepšati stranice mjesečnog newslettera, društvenih mreža i web-stranice. Kroz volontiranje u ovom timu postajete odgovorniji, svoje fakultetske obaveze možete ravnomjerno rasporediti a pri tome uživati kroz ovakav vid volontiranja. Atmosfera u timu je odlična i uvijek postizemo dogovor oko svih zadataka koji nam se dodjeljuju. Ukoliko ste kreativni, znate koristiti neke od grafičkih alata i zračite pozitivnom energijom pozivamo vas da nam se pridružite.

Edna Porča



PREDSTAVLJANJE TIMOVA SA POSEBNIM ZADUŽENJIMA

PREVODILAČKI TIM

Usko saradujući s redakcijskim timom, ovaj tim obavlja prevođenje mjesečnog biltena Fondacije Hastor na engleski i njemački jezik, kako bi bio dostupan svima onima koji prate Fondaciju, a ne razumiju jedan od zvaničnih jezika koji se koriste u našoj državi. Pored toga, tim prevodi godišnje izvještaje, članke na web-stranici i druge vrste dokumenata koji se potražuju u Fondaciji. Prevodima na dva svjetska jezika vijesti o događanjima, aktivnostima i uspjesima u Fondaciji dopiru do svih onih koji dijele i podržavaju misiju Fondacije. Na ovaj način naši međunarodni prijatelji su uvijek u toku s aktivnostima u Fondaciji.

Angažman u prevodilačkom timu Fondacije je zanimljiv i dinamičan. Osim redovnih zadataka vezanih za mjesečni bilten, Fondacija će vas često iznenaditi sa raznim tekstovima koje je potrebno prevesti. Smatram da je količina obaveza u ovom timu razumna i da se sve obaveze mogu stići bez problema. Između ostalog, volontiranje u prevodilačkom timu je ujedno i najlakši način na koji možete ostati u toku sa svim događajima unutar Fondacije. Prevođenje kao zadatak je interesantno u kontekstu prilagodbe naših fraza i izraza na stranim jezicima. Osim prevođenja, potrebno je udubiti se u originalni tekst kako bi prevod u sebi očuvao poruku i ton koji je redakcijski tim pokušao dočarati. Također, to je odlična prilika da razvijete ovu vještinu, unaprijedite svoje poznavanje stranog jezika ali i da popravite svoje vještine pisanja. Prevodilački tim je pun osoba od kojih možete dosta naučiti kroz povratne informacije a veliku prednost daje i činjenica da se zadaci obavljaju od kuće.

Vedin Klovo

PREDSTAVLJANJE TIMOVA SA POSEBNIM ZADUŽENJIMA

TIM ZA MONITORING

Tok sastanaka naših stipendista pomno prate članovi tima za monitoring i to ne isključivo iz kontrolnih razloga, naprotiv, u dosadašnjoj praksi se pokazalo da preko tima za monitoring dobijamo uvid u kreativne načine rada u toku sastanaka stipendista, saznajemo za njihove uspjehe te usvajamo nove ideje i mišljenja.

Monitoring tim nam prije svega omogućava da se upoznamo sa ostalim stipendistima i načinom na koji oni volontiraju. Prije nego što smo postali članovi monitoring tima mi smo i sami volontirali sa učenicima i u lokalnoj zajednici. U monitoring timu imamo mogućnost da vidimo drugačije načine na koji studenti mentori rade, kako omogućavaju učenicima da steknu nova znanja na kreativne načine. Biti dio monitoring tima mi je donijelo novu perspektivu u tome, upoznala sam grupe u kojima mentori potpuno shvataju želje i potrebe učenika, imaju prijateljski i tutorski odnos sa njima. Mislim da je to najveće bogatstvo monitoring tima, imati mogućnost da upoznamo što više volontera Fondacije Hastor. Kroz praćenje sastanaka često smo u prilici vidjeti talente učenika iz drugih gradova, što ne bismo imali priliku u drugom slučaju.

Nikolina Gagić



KLUB PRIJATELJA I DONATORA

Kroz šesnaest godina svog postojanja Fondacija Hastor svakodnevno unapređuje svoje aktivnosti i djelovanje, a sve u cilju ulaganja u obrazovanje i izgradnje kvalitetnijeg i prosperitetnijeg bosansko-hercegovačkog društva. Zahvaljujući angažmanu svih koji se svojim radom i djelom vežu za Fondaciju Hastor, prvenstveno njenog kolektiva, razvila se u najznačajniju i najveću fondaciju ove vrste na području Bosne i Hercegovine i regiona.

Danas, kada Fondacija ponosno broji više od 2200 stipendista iz 135 gradova i općina, uz nju stoji mnoštvo prijatelja i donatora koji prepoznaju misiju Fondacije i aktivno je podržavaju. Svojom nesebičnom podrškom te odlukom da svoju društvenu odgovornost usmjere ka investiranju u obrazovanje, naši prijatelji i donatori čine mogućim dugoročnu misiju Fondacije Hastor s vjerom da pozitivne promjene u društvu i njegova svjetlija budućnost dolaze zajedničkim radom, znanjem i uspješnim školovanjem.



VOLONTERI FONDACIJE HASTOR

65

Aganspahić Sead
Ahmetović Edin
Avdić Marizela
Bajgorić Muamer
Broz Zoran
Čivgin Nihad
Ćiva Edina
Delić Sanel
Deljković Zlatan
Duvnjak-Šehović Naida
Džanko Nermin
Đapo Haris
Hadžić Mehmedalija
Hadžiselimović Eldin
Hasagić Emina
Hasanović Merima
Hajdarević Džellila
Huseinović Šukrija
Hodžić Adnan
Hodžić Emina
Iseni Enes
Jalimam Emir
Jazvin Almir

Karović Esada
Kekić Kenan
Kovačević Mirsada
Kučuk Adisa
Lazović Nejlja
Milinović Linda
Morankić Feđa
Mustafić Samir
Palić Safet
Pašić Rabiha
Porobić Jasmin
Povlakić Abdulah
Pulić Mirza
Rahman Haris
Rizvo Marizela
Redžepović Aida
Redžepović Samir
Salkić Aida
Sarajlić Haris
Smajić Nermina
Šehović Miralem
Vuk Edina
Pehar Davor
Ovčina Denis

... i neka nam ne zamjere mnogi mnogi drugi, trebalo bi nam još makar 50 stranica da napišemo svu ljubav i energiju koju dobijamo od svih naših volontera.



PRIDRUŽITE NAM SE



66

Fondacija Hastor je organizacija koja punih 16 godina djeluje na području Bosne i Hercegovine tako što ulaže u obrazovanje djece i mladih, a posebno onih koji su marginalizirani usljed teškog socio-ekonomskog statusa i sredine u kojoj žive. Podstaknuta idejom da olakša školovanje i poboljša uslove života djece i mladih, Fondacija Hastor danas broji impresivnih 2207 stipendista u čak 135 općina širom Bosne i Hercegovine. Od samog početka djelovanja ohrabrujemo osnovnoškolce, srednjoškolce i studente da nam se jave i postanu dio velike porodice Fondacije Hastor. S obzirom na to da na adresu Fondacije Hastor svakodnevno pristiže veliki broj molbi za stipendiranje, nismo u mogućnosti prihvatiti i podržati sve one koji nam se jave iako to zaista želimo. Selekcija kandidata predstavlja jedan od najtežih zadataka naše komisije jer smo nerado prisiljeni da određeni broj molbi odbijemo, stoga nam je potrebna izvjesna podrška drugih kako bi veliki broj mladih i perspektivnih učenika i studenata dobio priliku za ostvarivanje svojih želja i snova. Naša misija iz godine u godinu jeste da osiguramo sredstva za stipendiranje velikog broja učenika i studenata, a uz sve to Fondacija Hastor čvrsto stoji uz svakog stipendistu, pružajući mu svu potrebnu podršku i pomoć do okončanja obrazovanja i pronalaženja zaposlenja, što je glavni cilj svakog stipendiste. Ovim putem pozivamo sve pojedince, zajednice i organizacije da budu dio Fondacije Hastor i pomognu nam da veliki broj stipendista dobije priliku za uspješno obrazovanje tako što će na svojevrsan način doprinijeti osiguravanju finansijskih sredstava za stipendiranje djece i mladih širom čitave Bosne i Hercegovine.

Ukoliko želite podržati rad Fondacije Hastor, uplatu donacije možete izvršiti na jedan od transakcijskih računa:

ASA Banka dd Sarajevo
1346101000825159

Unicredit Bank dd Sarajevo
3389002201775656

Raiffeisen Bank BH dd Sarajevo
1610000055230065



